

Itoe tempo telah menerbitkan kemorka-annja saorang panglima Tiauw Sian, jang madjoeken kapalnja sembari berseroe dengan soeara keras katanja :

„Barang siapa jang tiada takoet mati, boleh sigra madjoe bertanding dengan akoe, Lo Hoe Kiam !”

Baroe sadja ini perkataän habis dioetjapken, fihak Goan Tiauw soeda madjoe keloear Wie Jong Tat bersama kapalnja, seraja membilang katanja :

„Akoë, Joe Sian Hong, Wie Jong Tat, mendatengin !”

Berbareng ia lantas maenken iapoenja se-pasang golok Dji Gwat To menjerang pada itoe panglima moesoe, samentara Lo Hoe Kiam djoega mengangkat toembaknja boeat melawan perang. Begitoelah iaorang djadi saling berantem dengan sengit dan Wie Jong Tat jang melaenken ada saorang prempoean tentoe djoega tenanganja lemah, maka koetika berperang baroe ada sepoeloe djoeroes, ia soeda merasa soeker bisa menangin dengan kekoeatan, laloe ia belaga kala serta titah moendoerken kapalnja, sedeng Lo Hoe Kiam poen lantas madjoeken kapalnja boeat mengoedak.

Dengen menggelap Jong Tat mengambil

seboeah pana, balikin badannja langsoeng memana ka djoeroesannja sang panglima moesoe. Datengnja itoe pana ada begitoe lekas, hingga Lo Hoe Kiam tiada keboeroe boeat menjingkir dan telah mengenakan djitoe pada bagian atas dari dadanja sebla kiri, berbareng ia djadi djato roeboe di atas kapalnja. Zonder memboeang tempo lagi, Jong Tat lantas lompat ka kapalnja moesoe dan dengan satoe kali batjokan, djwanja Lo Hoe Kiam sigra melajang ka achirat.

Soldadoe-soldadoe fihak Goan jang djoega ikoet menerdjang ka kapalnja moesoe, telah koetoengi kapalanja itoe panglima Tiauw Sian. Samentara balatentara moesoe berikoet semoea toekang-toekang dajoeng, zonder melawan lagi pada lompat toeroen ka tengatenganja kapal, rata-rata pada menjeboet soeka menaloek.

Sesoeda itoe semoea mendjadi beres, Jong Tat lantas prenta pasang pakoe pada kapal moesoe dan dengan direndengin sama kapalnja sendiri laloe balik poelang ka barisannja.

Koetika mana, Oh Pit Khaij jang melawan perang dengan Ong Goan Swee, tempo soeda berantem kira-kira tigapoeloe djoeroes lebi, ternjata ia soeda kena didesek oleh Siauw Hoe sampe djalannja iapoenja gembolan djadi

kalang-kaboet, apalagi meliat Lo Hoe Kiam soeda terbinasa, dalem hatinja djadi semingkin riboet, tiba-tiba Ong Siauw Hoe poenja satoe Kek telah bisa menoesoek djitoe di bagian kiri sebela depan dari poendaknja.

Meliat Goan Sweenja mendapat loeka, semoea panglima moesoe lantas pada madjoe ka depan boeat menoeloeng, serta prenta toekang - toekang praoe aken tjepet balikin kapalnja boeat lari dari sitoe; sedeng Ong Goan Swee keloearken titah boeat semoea kapalnja madjoe memboeroe. Begitoelah dengn pana jang toeroennja seperti oedjan telah membikin Hoan Koen jang terbinasa ada berdjoembla besar sekali, lebi djaoe dalem kekaloetannja fihak moesoe begitoe roepa, Ong Hauw dapet mereboet moesoe poenja seboeah kapal.

Sesoeda lakoeken pemboeroean sekoetika lama, Ong Goan Swee prenta boenjiken gembreng boeat tarik poelang semoea pasoe kannja, serta balik kombali di pasang-grahannja di mana ia menjatet satoe-persatoe dari masing - masing poenja djasa, djoega ia prenta saorang oetoesan aken membawa rekest wartaken kemenangan, berangkat me-noedjoe ka kota radja dengan seboeah praoe ketjil jang bisa berlajar tjepet.

Sebaliknja Oh Pit Khaij jang balik poelang ka pasanggrahannja dengan beroleh kekalahan, di mana setelah memake obat loeka, laloe ia adaken pepreksaän pada seantero pasoekannja, maka ternjata fihaknja soeda keilangan doea boeah kapal perang, ampat orang panglima, serta soldadoe-soldadoe jang mati ampir berdjoeumlah 3000 djiwa.

Dalem hatinja djadi berpikir dengan kesel, bahoea ia moesti minta Koen Soe sendiri keloear perang, baroelah ada harepan boeat mendapat kemenangan. Tapi sebelonnja ia bisa berboeat lebi djaoe, sala satoe laskarnja telah dateng masoek merapport tentang kedatengannja sang Koen Soe.

Oh Pit Khaij djadi sanget girang, boeroeboeroe ia prenta oendang masoek itoe Koen Soe. Dan Sin Boe Todjin poen sigra naek ka atas kapal, sedeng Oh Pit Khaij keloear dari pasanggrahannja boeat menjamboet. kemoedian bersama - sama berdjalan masoek atawa setelah saling membri hormat laloe pada mengambil tempat doedoek.

„Mendenger Goan Swee soeda menampak kekalahan, Pin To sengadja dateng boeat menanja pri-keadaännja.”

Oh Pit Khaij lantass menoetoerken satoepersatoe tentang iapoenja kekalahan sampe

doea kali, seraja kemoedian membilang lebi djaoe :

„Ditilik dari stni, ternyata ini sekoempoelan Pit Hoe ada lebi tanggoe daripada itoe Hong Hoe Keng.”

„Tida apa,” djawabnja Sin Boe Todjin, „besok Pin To aken keloear perang dan pasti bisa kalaken marika itoe.”

„Ja, itoe semoea melaenken mengandel atas Koen Soe ampoenja kesaktian !” berkata Oh Pit Khaij sembari hatoerken trima kasi.

Sin Boe Todjin lantas merogo kasi keloear dari dalem Holo ketjil seboeah pil obat, masoekin dalem moeloetnja seraja gigit bikin antjoer dan kemoedian menggosok-gosok di bekas loekanja Oh Pit Khaij jang dalem sekedjapan sadja itoe loeka djadi semboeh dan kombali sebegimana biasa. Soeda itoe, Oh Pit Khaij laloe keloearken titah soepaja semoea pasoekannja boleh bikin persediaän boeat di esok hari maloemken peprangan besar dengen moesoe.

Mendenger marika poenja Koen Soe besok hendak madjoe sendiri di peprangan, Hoan Koen rata - rata djadi bergoembira boeat mengatoer itoe persediaän, kerna marika mengira besok iacrang tentoe aken perolehken kemenangan besar.

Demikianlah pada besok paginja, soeara bom kedengeran menderoeh - deroeh sampe menemboes ka langit, pasoeakan kapal perang dari moesoe keliatan madjoe berbareng mirip beriboe - riboe semoet lagi merajap di antara tembok jang poeti.

Samentara itoe, Ong Goan Swee kebetuelan ada lagi berdoedoek di pasanggrahanja, keliatan saorang spion dateng merapport katanja :

„Oh Pit Khaij poenja pasoeakan besar ada lagi mendatengin, dengan keadaän jang terlebi heibat dari kemarennja.“

„Inilah pasti ada Jauw To sendiri jang madjoe perang,“ berkata Goan Swee pada Him Hauw, „maka kae dan akoe haroes sekali berati - ati dengan iapoenja ilmoe siloeman.“

Him Hauw membenerken itoe bitjara dan begitoelah kedoea orang itoe laloe masing - masing pada selipken baek - baek di ramboet kapalanja itoe selembaer Hoe, pengasi goeroenja boeat bikin petja Sin Boe Todjin poenja ilmoe mengilang, serta tiada loepa membekel masing - masing poenja Popwee di badan. Kemoedian membawa semoea panglimanja dalem masing - masing poenja kapal perang, langsoeng pada madjoe berhadapan

dengen moesoe. Di mana ada orang jang oendjoekin pada Ong Goan Swee, katanja :

„Hareplah Goan Swee mendapat taoe, itoe orang pertapaän jang lagi berdiri di kapal sebela kiri, jalah ada Sin Boe Todjin!”

Ong Goan Swee poen lantastoeedjoeken pemandengannja pada djoeroesan jang di-oendjoek, tertampak olehnja itoe Jauw To ada lagi berdiri di atas kapala kapal, dengen berpakean setjara orang pertapaän. Pengag-wakannja tinggi-besar, beroemoer ampatpoe-loe taon lebi, di tangannja ada memegang sepasang pedang, samentara bendera jang melintang di blakangnja ada tertjantoem hoe-roef : „Hok Kok Koen Soe, Sin Boe Todjin”.

Dalem begitoe, kedengeran Goan Swee, Oh Pit Khajj, telah berseroe dengen soeara keras katanja :

„Siapakah jang hendak madjoe menangkep Ong Siauw Hoe boeat perolehken djasa!”

Berbareng habijnja ini oetjapan, keliatan iapoenja doea panglima pembantoe, Hoe Lie dengen tangan memegang seboeah golok besar dan Tek Hong dengen membawa Hong Thian Hoa Kek, doea-doea soeda madjoeken kapalnja dengen berbareng, sembari membentak katanja :

„Panglima Goan Tiauw jang tiada kenal

mati, mari tjoba dateng djoempaken kami, Hoe Lie dan Tek Hong, boeat bertanding mati-matian !”

Dari fihak Goan Tiauw poen madjoe ke-loear Tjo Ek Khoa, Hek Eng Lam, jang maenken toembaknja melawan pada Hoe Lie; sedeng Joe Ek Khoa, Ong Hauw, poeter goloknja dateng menjamboet serangannja Tek Hong.

Ong Goan Swee titah poekoel tamboer dengan seroe boeat menambahkan kegoembirahannja itoe panglima-panglima jang lagi bertaroeng. Sebagimana diketaoei Ong Hauw mempoenjai tenaga besar, begitoelah dengan keboeasan sebagi matjan galak, ia perangin Tek Hong, maka baroe ada bilang blas djoeroes, dengan satoe kali soeara sentakan keras, ia soeda batjok bikin terbela doea itoe panglima moesoe ampoenja kapala, hingga siapa djadi mati roeboe di atas kapalnja. Ong Hauw dengan tjepet lompat toeroen ka kapal moesoe, dengan diikoetin oleh sekalian balatentara mengamoek kalang-kaboet pada Hoan Koen. Sebagian besar dari laskar-laskar moesoe pada serahken diri boeat menaloek dan sebentar sadja itoe kapal perang dari Tek Hong dapet terampas oleh Ong Hauw.



Meliat begitoe, Sin Boe Todjin dengan membatja doanja boeroe-boeroe goenaken itoe ilmoe „mengilang” melajang naek ka atas oedara, dengan niatan hendak lakoeken pemboenoean atas dirinja Ong Hauw, tapi di atas kapalanja Him Hauw jang ada menjimpen itoe djimat memetjaken ilmoe begitoe, lebi siang soeda bisa dapet liat teges semoea gerakannja Sin Boe Todjin, maka dengan soera keras ia membentak katanja :

„Jauw To! Tiada ada goenanja kae oendjoekin ilmoe siloeman begitoe, akoe toch soeda bisa meliat betoel padamoe!”

Samentara itoe, Ong Goan Swee jang djoe-ga telah dapet liat njata ini semoea, lantas lepaskan iapoenja Popwee Hoei Tian Toei, jang meroepaken segoeloeng sinaran terang dateng memboeroe ka atas kapalanja sang Jauw To. Sin Boe Todjin tjepet menjingkirin dirinja, sedeng dalem hatinja merasa terprandjat bahoea Goan Tiauw poenja Goan Swee dan Sian Hong toch soeda bisa memetjaken iapoenja ilmoe „mengilang”.

Ong Siauw Hoe menoeding dengan tangannja seraja memaki dengan soera keras:

„Jauw To, kae masi sadja tinggal berdiam di atas mega, apa hendak menoenggoe mati?”

Sehabisnja oetjapken ini perkataän, lagi satoe kali dengan djeridjinja menoeding pada itoe Hoei Tian Toei, Siauw Hoe membentak katanja :

„Hajo, bolehlah lantast poekoel mati ini satoe Jauw To!”

Mendenger begitoe, Sin Boe Todjin merasa amat kaget, boeroe - boeroe ia balik poelang ka kapalnja sendiri, serta liatken badannja jang sedjati, kemoedian dengan soeara sengit ia menjentak :

„Gladak ketjil, kaeo sekarang soeda bisa petjaken akoepoenja ilmoe, itoelah berarti jang kaeopoenja adjai soeda sampe. Kaeo boleh liat akoepoenja Popwee sebentar aken mengambil djiwämoe.“

Sambil oetjapken ini perkataän, sigra djoega dari dalem kantong koelit matjan ia ambil keloeat sebidji Kim Tjoan dan lempar ka atas oedara, jang dalem sekedjapan sadja telah beroba mendjadi segoeloeng asepi item memboeroe pada Ong Siauw Hoe.

Ong Goan Swee tiada mengarti itoe ada Popwee matjem apa, tapi ia soeda lantast lemparin poela itoe gembolan Hoei Tian Toei, jang telah melajang naek ka atas, moekoel pada Kim Tjoan terseboet sampe djato masoek ka dalem laetan, linjap dengan

tiada kelihatan bajangannya sekalipoen. Kemudian Ong Siauw Hoe laloe panggil poelang iapoenja Popwee dengen satoe kali gape sama tangannya.

Samentara Sin Boe Todjin soeda begitoe morka, lantas ia lepaskan lagi beroentoen-roentoen seadanya itoe ketinggalan seblas Kim Tjoan, jang membikin asep item bergoeloeng-goeloeng seperti tersebar penoe sekiter oedara. Ong Goan Swee djadi amat terprandjat, lekas-lekas ia lemparken poela itoe Hoei Tian Toei ka oedara jang mendergerken soeara keras seperti goentoer, berbareng mementjarken bebrapa goeloeng sinaran terang dan dalem sekedjapan sadja itoe seblas Kim Tjoan, rata-rata soeda terpoekoel djato ka dalem laoetan.

Tentoe sadja itoe keadaan membikin Siauw Hoe djadi sanget girang, sesoeda lebi doeloe menjimpen poelang iapoenja Popwee, laloe dengen soeara keras ia berseroe :

„He, Jauw To, kaloe masi poenja laenlaen matjem Popwee, silahken boleh keloearken sama sekali dan kae nanti liat begimana Poen Swee bikin poena satoe-per-satoe, agar kae bisa mengetahoei akoepoenja kebisaän.”

„Ja,” berkata sang Todjin dengen soeara

keras, „Pin To djoega masi poenja laen roepa kesaktian !”

Sehabisnja berkata, moeloetnja keliatan kemak - kemik membatja doanja, kemoedian dengan menoeding ka moeka laoetan, ia membentak : „Lekas !”

Maka dalem sekedjapan sadja, keliatan di sitoe soeda terbit angin toefan jang meloeloe dateng menjapoe ka arah barisan dari pasoean kapal perangnja fihak Goan. Aer ombak meroepaken gloembang heibat, menderoeh-deroeh soearanja mirip gledek jang santer. Ini semoea tjoekoep membikin kapal-kapalnja Goan Tiauw dapetken gontjangan loear biasa kerasnja dan ampir sadja pada terbalik. Goan Koen sekalian djadi tiada bisa berdiri tetep di moeka kapal, soeara sesambatan dan djeritan kedengeran begitoe rioeh, seoepama hendak memetjaken koeping.

„Djangan takoet dan goegoep,” berseroe Ong Goan Swee dengan soeara keras, „Poen Swee toch ada poenja kesaktian boeat petjaken itoe ilmoe !”

Ia lantas keloearken dari kantongnja itoe katja wasiat Pho Long Keng, djoendjoeng tinggi di tangannja seraja dengan menantang angin ia katjaïn satoe kali dan bener sekali kedjoedjoeran selaloe menangin ketjoerangan,

begitoelah sekedjapan sadja sang angin ke-  
liatan sirep dan ombak poen tenang.

Itoe waktoe Hek Eng Lam jang masi sa-  
dja berantem teroes dengan Hoe Lie, sampe  
ada kira-kira anempoeloe djoeroes lebi, Hek  
Eng Lam soeda beroentoeng bisa menoesoek  
mati pada Hoe Lie serta dengan goenaken  
kemenangannja ia poen dapet merampas itoe  
kapal perang dari panglima moesoe jang ter-  
binasa.

Samentarn Goan Swee kita telah menge-  
loearken titah boeat madjoeken seantero pa-  
soekannja menerdjang pada fihak moesoe  
dengan setjara amat seroe, hingga membikin  
Hoan Koen tiada bisa menangkis dan ke-  
banjakan pada lari moendoer.

Dalem kegoegoepan, Sin Boe Todjin niat  
hendak oendjoekin poela iapoenja ilmoe ke-  
saktian, tapi Ong Goan Swee diam-diam  
soeda lepaskan lebi doeloe iapoenja Hoei  
Tian Toei, hingga koetika merasa satoe si-  
naran terang lagi memboeroe padanja, sang  
Jauw To tiada sempet boeat menjingkir dan  
begitoelah itoe satoe gembolan telah me-  
moekoel djitoe pada blakang poendaknja jang  
membikin ia rasaken satoe kesakitan jang  
tiada terkata dan boeroe-boeroe ia lari ma-  
soek ka dalem kapalnja. Sedeng Hoan Koen

dengen keriboetan besar pada melarikan diri bersama kapalnja.

Goan Koen madjoeken kapalnja mengoedak teroes sembari melepaskan djoega anak pana jang toeroennja seperti oedjan menoe-djoe ka djoeroesannja Hoan Koen, hingga membikin laskar-laskas Tiauw Sian pada sesambatan.

Dalem begitoe, Sin Boe Todjin sesoedanja memake pil obat boeat iapoenja loeka, telah dateng poela dengen lekas ka kapala kapal, menghoenoes pedang di tangan serta moeloet berkemak kemik boeat pangggil dateng berbagi-bagi soldadoe iblis. Begitoelah sesaät kemoedian orang liat mega-mega gelap toeroen menoe-toepin moeka laoetan, berbareng sedjoembla besar soldadoe-soldadoe iblis, dengen tangan memegang berbagi-bagi sendjata perang, dari tenga oedara soeda toeroen ka bawah dateng menerdjang pasoekannja Goan Koen setjara heibat sekali.

Meliat begitoe, Goan Koen djadi merasa amat terprandjat, ampir berbareng kedengeran iaorang membilang katanja :

„Hola, Jauw To soeda mengoendang dia poenja kake-mojang boeat bantoe perang. Apa kita moesti bikin?'

Ong Goan Swee sendiri poen djadi be-

roepa seperti orang kebingoengan dan ampir ia ilang akal tjara begimana moesti petjaken itoe ilmoe. Apabolehboeat ia terpaksa memoedja lagi itoe Hoei Tian Toei, jang kedengeran bersoeara seperti gledak dan menjamber seperti kilat, itoe barisan soldadoe iblis keliatan djadi pada oendjoekin romannja jang sedjati, jalah semoea meloeloe ada dari goentingan kertas poeti belaka, melajang-lajang djato ka moeka aer, begitoe djoega mega-mega item berbareng djadi boejar seanteronja.

Itoe tempo, Hoan Koen jang mati terbina oleh kerna dioedjanin anak pana semingkin tamba besar djoemblahnja, sedeng selehinja pada lari minggat bersereboetan. Dan pasoeakan kapal perang dari fihak Goan setelah melakoeken poela pengoeberan boeat sekoetika lama, baroelah Ong Goan Swee membri tanda boeat panggil poelang antero pasoeakannja dan balik kombali ka pasang-grahannja.

Pada ini pertempoeran, fihak Goan ternjata soeda bisa merampas tiga boeah kapal perangnya Tiauw Sian, samentara laskar-laskar Hoan jang menaloek ada berdjoemblah boekan sedkit, jang oleh Goan Swee diprenta tahan sadja serta membri marika ke-

tjoekoepan dalem hal makan dan pake. Kemoedian Goan Swæe kita mengatoer rekest boeat merapportken tentang kemenangannya ka kota radja, lebi djaoe ia poen menjatet dengan djoedjoer dalem boekoe djasa dari masing-masing panglima ampoenja pahala.

Sjahdan Oh Pit Khaij sesoeda lari poelang dengan kekalahan besar, boeroe - boeroe ia keloearken prenta, soepaja lantas moeatin ka dalem kapal - kapal itoe segala ransoem-ransoem dan laen-laennja jang tersimpen di Soa Boen To, aken kemoedian gampang diangkoet pergi begitoe keadaän ada mendesek.

„Mengapa Goan Swæe moesti djadi begitoe ketakoetan,” berkata Sin Boe Todjin. „kaloe kita lakoeken peperangan poela, Pin To harep fihak kita nanti bisa perolehken kemenangan seloeasnja.”

„Tapi, boekan sadja Koen Soe poenja semoea ilmoe dan Popwee dapet dipoenaken oleh marika, malahan Koen Soe sendiri soeda dapetken loeka di badan,” begitoelah katanja Oh Pit Khaij dengan sorot berdoeka, „begimanalah sekarang kita bisa harep aken mendapet kemenangan poela?”

„Pin To masi poenja satoe golek „Siang Tok To” jang terdjadi dari tjampoeran se-



ratoes matjem ratjoen-ratjoen djahat," berkata Sin Boe Todjin, „kapan itoe golok kena terbatjok di badan orang, begitoe nampak dara, orangnja lantas djoega tiwas djiwanja. Kerna ia ada begitoe berbisa, maka Pin To tiada brani sembarang menggoenaken; tapi sekarang setelah keadaän kita ada sanget terantjem, apablehboeat kaloe besok loesa madjoe lagi di peprangan, Pin To terpaksa goenaken sadja itoe San Tok To. Dengan begitoe, kita tentoe bisa dapetken kemenangan."

„Seande masi ada lagi Popwee begitoe, ja, baik sekali besok loesa lantas digoenaken," achirnja berkata lagi Oh Pit Khaij. „tetapi kitapoenja balatentara selaennja banjak dapet keroesakan baroe-baroe ini, begitoe poen jang mati kerna sakit selama brapa taon, sekarang tjoema tinggal ampir separo, sebaliknya Goan Koen ada poenja djoemblah djaoe lebi besar, lagipoen semoea masi bertenaga baroe; dari itoe boeat mendjaga-djaga, toch ada baeknja djoega kaloe semoea barang dan ransoem tjepet tjepet dimoeatken dalem kapal-kapal, soepaja kemoedian oeroesan kita tiada terlaloe hadepin kesoekeran."

„Goan Swee poenja perkataän djoega be-toel," kemoedian Todjin menjaoet.

Demikianlah dikeloearken prenta boeat selekasnja lantass mengangkoet semoea barang-barang jang tersimpenn di itoe poelo dan toeroenken dalem bebrapa kapal besar sampe bersi semoeanja.

Tiga hari berselang, fihak Goan Koen soeda madjoeken antero pasoeakan kapal perangnja boeat maloemken perang lagi.

Mendenger rapportan itoe, Goan Swee mengeloearken prenta katanja :

„Bahoea Hoan Koen sekarang selaennja mempoenjai djoemblah banjak koerang, djoe-ga atjapkali mendapat kekalahan jang membikin hati marika kebanjakan kaloet. Ini hari, Tjiong Tjiang bersama pasoeakannya masing-masing haroes bertempoer atawa lakoeken pemboeroean soenggoe - soenggoe hati, soepaja di ini kali kita nanti bisa dapetken kemenangan jang sampoerna betoel.”

Semoea orang pada bersorak-sorak, oendjoekin kegoembirahannya aken bertempoer mati-matian. Dan tiga kali soeara bom di-boenjiken, semoea pasoeakan kapal perang Goan Koen madjoe keloear dengan barisan jang rapi, sampe berhadapan deket sekali pada pasoeakannya moesoe.

Sin Boe Todjin berdiri di kapala kapalnya, memandeng iapoenja balatentara sendiri ke-

liatan ampir seanteronja pada meroendoekin kapala dan beroepa lesoe, sebaliknja soldadoe - soldadoe Goan Koen, satoe - persatoe tertampak bergoembira dan bersemangat. Meliat begitoe hatinja djadi sanget mendongkol, ia lantas prenta madjoeken dengan sigra kapalnja, sembari membentak :

„Ong Siauw Hoe, akoe ingin bikin poe-toesan pasti antara kae dan akoe, siapa jang menang dan siapa jang kala, agar soepaja tiada terlaloe banjak membinasakan jiwa manoesia !”

„Ha, ha,” berkata Ong Siauw Hoe dengan ketawa besar, „kae toch ada satoe orang jang soeda kala perang, begimana masi bisa keloearken ini oetjapan.”

Sehabisnja berkata, ia lantas maenken Hoa Keknja langsoeng menjerang pada itoe Todjin, siapapoen laloe menangkis dengan pedang di tangan dan tempo berperang soeda bilang blas djoeroes, Sin Boe Todjin merasa tiada oengkoelan boeat melawan lebi lama. sigra djoega ia titah moendoerken kapalnja dan Goan Swee djoega lantas prenta madjoeken kapalnja boeat mengoedak, begitoe poen laen - laen panglima Goan rata-rata pada toeroet madjoeken kapalnja masing - masing aken menerdjang pada moesoe, jang oleh

Oh Pit Khaij dengan membawa semoea pasoeakan kapalnja madjoe melawan perang.

Sin Boe Todjin lepaskan iapoenja San Tok To, seraja berseroe katanja :

„Ong Siauw Hoe, liatlah akoepoenja San Tok To, dateng mengambil djiwamoe !”

Siauw Hoe meliat sang golok jang sekarang berada di oedara, mengeloearken asepiem berikoet sinaran api, mirip sebagai matjan boeas jang memboeroe ka bawah. Dengan tiada mengetahoei apa matjem adanja itoe Popwee, lagi-lagi Siauw Hoe lemparin iapoenja Hoei Tian Toei ka atas. Maka itoe golok jang lagi hendak ka bawah, mendadak berbentrokan dengan Hoei Tian Toei jang lagi hendak naek ka atas. Satoe soeara keras kedengeran dan San Tok To keliatan djadi terpoekoel djato dalem laoetan.

Ong Goan Swee panggil poelang iapoenja gembolan wasiat itoe, seraja berseroe dengan soeara keras katanja:

„Jauw To, kaloe masi ada kaoepoenja Popwee, hajo, boleh sigra keloearken seanteronja, Poen Swee nanti boleh beresin satoe-persatoe.”

Sin Boe Todjin djadi sanget morka, ia menggeroeng seperti soeara gledak dan berkata :

„Ong Siauw Hoe, kae soeda brani bikin petja akoepoenja ilmoe, sekarang akoe hendak bertempoer mati-matian!”

Tapi Him Hauw soeda goenaken itoe tempo selagi sang Todjin tiada bikin persediaän, diam-diam lepaskan iapoenja pedang Tjam Kauw Kiam ka oedara, maka Jauw To jang semata-mata toedjoeken pikirannja boeat madjoenja iapoenja kapal, baroe mengetahoei koetika Tjam Kauw Kiam soeda melajang deket sekali padanja; tentoe sadja boeat itoe ia tiada mempoenjai kesempatan poela aken berkelit, hingga pedang terseboet telah membatjok betoel di bagian poendak kirinja. Ia djadi mendjerit satoe soeara dan berbareng lompat toeroen ka dalem kapal, serta boeroe-boeroe memake pil obat.

Him Hauw simpen kombali iapoenja pedang wasiat, laloe dateng menerdjang pada fihak moesoe, membikin panglima Hoan hadepin keroesakan besar dan jang mati terbina sampe tiada kena diitoeng, selebinja pada lari minggat sedapet-dapetnja. Samentara Ong Goan Swee berikoet semoea pasoekannja mengoedak dan mengamoek dengan goenaken sepenoenja tenaga, teroes-meneroes sampe besoknja hari, di mana iaorang soeda meliwatin poelo Soa Boen To, baroe-

lah Goan Swee prenta brentiken tentaranja.

Di sitoe ternjata kombali marika telah dapat reboet doea boeah kapal moesoe. Ong Goan Swee lantas prenta adaken pesta besar boeat mendjamoe sekalian balatentaranja, djoega sebagai peringetan atas itoe kemenangan.

Sebaliknja pasoeakan kapal perangnja Hoan Koen sesoeda minggat djaoe djoega, baroelah iaorang brani brenti serta berdiriken pasanggrahan di moeka aer.

„Ja,” kemoedian Sin Boe Todjin berkata pada Oh Pit Khaij, „nanti malem Pin To aken membawa bilang blas kapal perang, lakoeken pengamoekan dengan menggelap pada pasanggrahannja moesoe, serta keloearken ilmoe boeat membakar marikapoenja kapal-kapal perang. Dengan begitoe, tiada meleset lagi kita tentoe aken beroleh kemenangan.”

Oh Pit Khaij poen moefakat dengan itoe bitjara, maka ia lantas atoer menjediaken sepoeloe boeah kapal berikoet laskar-laskarnja dan kemoedian serahken itoe semoea pada sang Koen Soe.

Sin Boe Todjin menoengoe sampe kira-kira djam satoe malem, baroelah dengan tiada bersoeara sedikit djoega, ia mengepalai

itoe sepoeloe kapal perang, madjoe pelahan-pelahan menoe djoe ka pasanggrahannja Goan Tiauw.

Adapoen Ong Siauw Hoe amfoenja peratoeran dalem pasoe kan memang ada amat sampoerna dan beres, setiap malem tentoe ada bebrapa praoe-praoe spion, jang saling ganti dilepaskan ka tempat-tempat sedikit djaoe boeat lakoe ken pengintipan atawa penjerepan apa-apa jang bisa tertampak di sekiternja sitoe. Demikian itoe malem, sala satoe praoe terseboet, soeda bisa dapet liat gerakannja moesoe, maka boeroe-boeroe ia balik poelang ka dalem pasanggrahan, memboenjiken tamboer tanda mengoempoelin sekalian panglima-panglima.

Dan dalem sebentar an sadja, semoea panglima keliatan soeda pada dateng memboeroe, serta berkoempoelan di kapalnja Goan Swee. Begitoe djoega Ong Goan Swee dengan lekas telah berdoedoek di pasanggrahannja dengan dihadepin oleh sekalian panglima-panglima, samentara itoe spion dateng merapport katanja :

„Djaoe-djaoe ada keliatan bilang blas kapal-kapal perang moesoe, lagi mendatengin dengan menggoeloeng bendera serta tiada boenjiken tamboer, boleh djadi itoe ada pa-

soekan moesoe jang hendak menjerang pasanggrahan dengan menggelap, maka itoe hamba boeroe-boeroe dateng membri rapportan."

Setelah mendengar rapportan ini, Goan Swee laloe kasi persen pada itoe penjoeloe kabar, kemoedian ia keloearken prenta pada semoea panglima panglima, katanja:

„Peprangan di waktoe siang, Jauw To selaloe mendapat kekalahan, dari itoe sekarang di waktoe malem dia bawa pasoeekannya boeat tjoba membokong pasanggrahan kita Aken tetapi, pertempoeran jang dilakoeken tenga malem boeta, soeker bisa dibedakan antara kawan sendiri dan moesoe, ini sebab biarlah pasoeekan kita tinggal tetep sadsja di tempatnja, kaloe marika dateng mendeketin, bolehlah dilepaskan oedjan pana boeat menangkis, sampe marika tida dapet madjoe lebi djaoe."

Semoea panglima - panglima mendapat ini titah, laloe pada balik poelang ka masing-masing poenja kapal boeat mengatoer itoe pendjagaän, sedeng sebentar lagi pasoeekan kapal Hoan Koen terseboet soeda sampe dekat, berbareng di sitoe marika pada njalaken obor-obor, serta boenjiken tamboer dan madjoe mengamoek dengan pengharepan fi-



hak Goan Tiauw tiada bikin persediaan sama sekali. Tetapi baroe sadja marika hendak mendeketin, dari berbagi-bagi kapalnja Goan Koen telah dilepaskan anak pana jang toeroennja sebagai oedjan, hingga membikin marika boekan sadja tiada bisa lantas madoe, hanja berbalik moendoer poela ka blakang boeat tiada mendjadi korbannja sang anak pana.

Samentara itoe, Sin Boe Todjin jang ada berdiri di kapala kapal, lantas menjemboer keloear api Sam Boat Hwee dari moeloetnja. Adapoen api itoe sekeloearnja dari moeloet atawa begitoe kena angin lantas beroba mendjadi besar dan berkeping-keping. Jang besaran ada keliatan seperti roda grobak, sedengjang ketjilan ada seoepama piring, satoe sama laen ada samboeng-menjamboeng dan saling menarik; menoeroet tioepan angin sebentar telah terantar sampe di barisan kapal-kapalnja fihak Goan Tiauw. Berbareng di sitoe djadi terbit kebakaran dan dalem sekedjapan sadja soeda ada brapa boeah kapal Goan Koen jang didjilatin oleh api terseboet, hingga satoe keriboetan tiada dapet tertjega poela, berikoet soeara soeara brisik jang membilang:

„Hajo, lekas potongin tali iketan dan lari

dari sini, soepaja tiada kena kerembet bahaja terdjangannja api!"

Tapi Ong Goan Swee lekas berseroe dengan soeara keras katanja :

„Djangan goegoep, Poen Swee ada poenja ilmoe boeat singkirin ini bahaja!"

Boeroe-Boeroe ia ambil keloeur dari kantongnja itoe katja Peng Ho Keng, hadepin masing-masing kapal jang lagi kebakaran sambil mengatja dengan katja itoe. Sekedjapan sadja, semoea api djadi padem sendirinja.

Meliat begitoe, Sin Boe Todjin berbalik djadi amat goegoep, tiada ada soeatoe akal jang ia sekarang bisa goenaken ; samentara Ong Goan Swee di saät mana kembali telah melepaskan iapoenja Hoei Tian Toei, jang toeroen memoekoel dengan djitoe di poendak blakangnja Jauw To, hingga membikin ia itoe djadi moenta-moenta dara dan boeroe-boeroe lari toeroen ka dalem kapalnja serta lekas memake obat.

Itoe tempo, Hoan Koen jang terbinasa oleh anak pana tiada teritoeng banjaknja, sedeng sisanja dengan tergopo-gopo pada lari poeläng dan Oh Pit Khaij jang mendinger ini warta, boekan maen kagetnja.

Sebentar lagi, Sin Boe Todjin poen telah dateng ka sitoe, sembari membilang pada i-

toe Goan Swee dari fihak Tiauw Sian :

„Ach, tiada njana Ong Siauw Hoe ada begitoe Lihaij! Pin To poenja Popwee dan Pin To poenja semoea ilmoe, antero kena dipoenaken serta dipetjaken olehnja, membikin sekarang Pin To djadi kepoetoesan akal. Ja, terang sekali ini semoea soeda ada takdirnja Toehan, maka bisa moentjoel itoe satoe gladak.”

„Soedalah,” berkata Oh Pit Khaij dengan mengela napas pandjang, „Koen Soe lagi mendapet loeka di badan, baeklah pergi mengaso sadja. Pelahan-pelahan nanti kita berdame poela begimana moesti berboeat.”

Si Todjin merasa maloe hati sendiri, apa-bolehboeat ia terpaksa balik ka pasanggrahannja, naek di tempat tidoer sembari berbaringan.

Belon lama ia tidoeran dalem keadaän lajap-lajap, tiba-tiba kedengeran soeara tamboer amat gemoeroeh, berbareng ada dateng penjoeloeh kabar jang merapportken bahoea Ong Siauw Hoe lagi madjoeken pasoeekannja dateng menerdjang dari lima djalanan, dengan keadaän amat heibat.

Mendenger itoe rapportan, Sin Boe Todjin bersama Oh Pit Khaij terpaksa membawa sekalian panglimanja, djoega terpetja djadi li-

ma djalanan boeat menjamboet moesoe.

Kiranja Ong Goan Swee pada koetika si Todjin telah melariken diri, lantas prenta pada Him Hauw, Wie Jong Tat, Hek Eng Lam dan Ong Hauw berikoet ia sendiri, membawa pasoeakan masing-masing, madjoe menjerang dari lima djoeroesan. Dan apabila kedoea fihak soeda saling berhadapan, ternjata Oh Pit Khaij bertemoe dengan Ong Hauw, di mana marika djadi saling berantem. Tetapi baroe sadja berdjalan tigapoeloe djoe-roes lebi, Oh Pit Khaij moelai keteter dan achirnja Ong Hauw poenja golok telah bisa melanggar poendak kirinja itoe Goan Swee dari fihak moesoe, jang lantas boeroe-boeroe lompat toeroen ka dalem kapal, sedeng masing-masing kapal jang laennja, poen beroentoen-roentoen hadepin kekalahan. Begitoelah dengan keroesakan besar antero pasoeakan Hoan Koen pada lari dan moendoer koetjar-katjir.

Ong Goan Swee mengandjoerin aken seantero pasoeakannja boeat lakoeken pengoeberan seroe zonder memandeng ketjapean. Maka dalem begitoe, fihak Goan kombali dapet reboet tiga boeah kapalnja moesoe.

Oh Pit Khaij bersama pasoeakannja jang sekarang tjoema ketinggalan sepoeloe-riboe

djiwa lebi dengan semoeanja tiada bernapsoe, terpaksa lari masoek dan bertempat dalem moeara Saij Tjoe Khauw.

Ong Siauw Hoe djoega prenta berdiriken pasanggrahan di moeka aer kira-kira berantaraän doe paal dari pintoe moeara.

Selandjoetnja Goan Koen beroelang-oelang sampe tiga hari dateng meminta perang, tapi Hoan Koen soeda tiada brani meladenin.

Satoe waktoe, Ong Goan Swee ada membilang pada sekalian panglimanja :

„Ini moeara ada terlaloe sempit, kapal kapal tiada dapet bergerak setjara leloeasa. Bisa djadi kita aken hadepin kesoekeran kaloe moesoe mendadak terdjang pasanggrahan kita dengan menggelap dan di waktoe malem. Ini sebab, Poen Swee menetepken Tjo dan Joe Sian Hong, bersama Tjo dan Joe Ek Khoa, Sie-wie Tjiang Koen, dengan bergiliran masing-masing satoe malem, membawa sepoeloe praoe ketjil dan anemratoes soldadoe, meronda di sepandjang pantei.”

Apabila menerima ini titah, keempat panglima itoe poen lantas pada berlaloe.

Setenga boelan telah liwat zonder terdjadi peprangan satoe apa, oleh kerna fihak Hoan senantiasa tiada brani keloe ar bertempoer.

Itoe satoe malem, djoestroe djato giliran-

nja Wie Jong Tat jang meronda. Tatkala mana, remboelan membri tjahaja remeng-re-meng dan sewaktoe orang meronda sampe djam tiga malem, samar-samar tertampak dari tempat djaoe lagi mendatengin seboeah kapal pesisir.

Wie Jong Tat laloe membri prenta pada orang orangnja, sembari membilang :

„Soeda sekian taon Hoan Koen teroes-teroesan menggangoe keamanan San Tong, seloeroe negri pada mengetahoei, maka moes-tail amat tenga malem boeta di sini bisa ada berlajar kapal dagang. Ja, itoelah pasti ada seboeah kapal jang membawa mata-matanja moesoe. Hajo, tjepet lepasken bom pertandaän boeat menangkep.”

---

## XLII.

Sin Boe Todjin poetoës daja tenaga poen  
remoek. Oh Pit Khaij dateng adjal  
badan toeroet terbinasa.

---

Itoe kapal jang keliatan, ternjata ada seboeah praoe jang bisa berdjalan ladjoe, kedoea sampingnja terdapat 40 lebi toekang dajoeng. Dengan ketjepetan loear biasa kapal itoe mendatengin, tapi di sitoe soeda ada ampat boeah kapal ketjil dari Wie Jong Tat jang madjoe mengoeroeng, sambil berseroe katanja :

„Apa itoe ada kapal spion? Brenti! Kaloe bantahan, kitaorang aken lantas lepaskan anak pana!”

Samentara dari kapal terseboet kedengeran ada soera orang jang menjaoet katanja :

„Bahoea ini kapal adalah kapal dagang dari Tiong Goan dan kitaorang djoega ada membawa soerat-soerat ketrangan jang lengkep dari pembesar negri, hareplah boleh silahkan Loja preksa.”

Sesaät kemoedian, Wie Jong Tat poen telah sampe di sitoe. Ia sigra naek ka atas kapal dan prenta dateng mengadep itoe sekalian toekang dajoeng serta penoempangnja, jang ternjata sama sekali ada berdjoemblah

anempoeloestoe orang. Marika rata-rata pada berloetoet di hadapan itoe Sian Hong sembari mantoek-mantoekin kapalanja.

„Kaoeorang dateng dari mana?” menanja Jong Tat kemoedian, „membawa barang apa dan hendak pergi ka mana? Ada brapa orang toekang praoe dan brapa orang soe-dagar atawa penoempang?”

„Kita sekalian meloeloe ada toekang-toekang dajoeng sewaän, sedeng toekang praoe jang tetep melaenken satoe orang,” begitoe-lah djawabnja itoe semoea orang, „madjikan kapal sendiri ada pake ini kapal boeat angkoet bahan-bahan obat aken didjoeal ka tana Tiauw Sian.”

Jong Tat laloe prenta panggil mengadep sang madjikan kapal, siapa poen sigra madjoe berloetoet ka depan memperkenalkan dirinja. Ia ada saorang jang telah beroesia ampir limapoeloe taon, menoetoerken sebagian dari asal-oesoelnja sembari membilang:

„Hamba ada bernama Tjin Saij Po, soeda sedari doeapoeloe taon lamanja, lakoeken perdagangan koeliling ka berbagi-bagi negri tetangga. Hamba beroema tetep dalem kota radja, boeat mana hamba ada pegang soerat ketrangan dari kepala negri berikoet djoe-ga soerat pas, goena teroendjoeok sebagai ke-



saksian.”

„Dan sebagai satoe soedagar, moestail sekali kae tiada mengetahoei bahoea Tiau Sian lagi membikin roesoe, serta berbalik sengadja dateng kemari. Inilah tentoe ada satoe resia jang mengandoeng ketjoerangan.”

„Oleh kerna soeda dapat kabar bahoea Hoan Koen kena dipoekoel antjoer oleh Loja sekalian sehingga lari moendoer,” berkata lagi Tjin Saij Po, „maka itoe hamba brani dateng kemari.”

„Tjoba oendjoekin kemari itoe semoea soerat-soerat,” memerenta Jong Tat kemoe dian.

Tjin Saij Po poen lantas ambil keloe ar itoe soerat-soerat dan persembahkan ka atas. Samentara Jong Tat setelah memereksa itoe semoea, ia dapetken factuur obat melaenken tertjatet obat-obatan kasar dan berharga hanya 1200 tael lebi; sedeng soerat pas ada memake tjap kebesaran dari Goan Seng Houw, Lauw Tjiat, hingga inilah menerbitken ketjoerigaän hatinja Sian Hong kita, serta laloe menanja :

„Tetapi, apa sebab kae soeda tiada bawa soerat pas dari kapala negri, sebaliknya ada menggoenaken kepoenjaännja Goan Seng Houw ?”

„Ja, inilah tersebut kapala negri di tempat kediaman hamba meminta ongkos terlaloe berat boeat itoe,” djawab Tjin Saij Po, „sedeng hamba ada poenja satoe familie jang berkerdja di tempatnja Goan Seng Houw, maka atas perteloengan siapa hamba djadi bisa dapet itoe pas.”

Wie Jong Tat menggoleng kapalanja se-  
raja berkata poela:

„Ach, kaoepoenja barang bawaän tjoema berharga 1000 tael lebi, biarpoen kaoe bisa tarik keontoengan dari sitoe, tapi akoe sangsi kaloe itoe bakal bisa menoetoep kaoepoenja ongkos boelak balik, bajaran serta makannja ini semoea toekang praoe. Ha, terang sekali kaoe telah berdjoesta!”

Sehabisnja berkata begitoe, ia lantas pren-  
ta iket doeloe itoe eigenaar kapal serta se-  
kalian orangnja, aken menoenggoe Ong Goan  
Swee ampoenja poetoesan.

Beberapa orang soldadoe lantas berkerdja  
atawa sebentar sadja semoea isi kapal itoe  
soeda teriket beres, langsoeng kemoedian  
bersama kapalnja dibawa poelang.

\*  
\* \*

Arkian ditjeritaken Goan Seng Houw, Lauw  
Tjiat, setelah Ong Siauw Hoe berangkat pergi

perang dan blakangan Giauw Tjoe Soe balik poelang di kota radja, tiada ada bekel soerat balesan dari sang poetra, dalem hatinja djadi amat bertjoeriga. Kemoedian ia prenta sala satoe orangnja jang boleh dipertjaja, pergi ka Teng Tjioe boeat lakoe-ken penjelidikan dan selang brapa hari orang itoe soeda balik poelang, sambil membri rapportan bahoea Lauw Ke Pek teroes-teroesan ada disimpn rapet dalem grobak krangkengan. Samentara dari Ong Siauw Hoe poenja soerat, sebaliknya ada diseboetken jang itoe poetra senantiasa ada terpake betoel dalem barisan.

Mendapat ini semoea ketrangan, Lauw Tjiat djadi merasa sanget panasaran pada Ong Siauw Hoe dan anggep ia itoe sengadja hendak mengiket permoesoean dengan ia. Samentara itoe, iapoenja sala satoe Boen Seng jang paling tjerdik telah mengoendjoekin pada Lauw Tjiat, katanja :

„Ong Siauw Hoe alias Siong Hoa, kaloe disingkirken itoe satoe hoeroef: „Siong”, tidakah bisa djoega dibatja mendjadi „Ong Hoe Siauw Hoa”, Hong Hoe Keng ada memake sendjata Kek, sedeng ia djoega menggoenaken Hong Thian Hoa Kek, lagipoen dia beroman angker dan beda djaoe dari

orang kebanyakan, pasti sekali dia itoe ada Hong Hoe Keng ampoenja poetra Hong Hoe Siauw Hoa dan telah pake nama palsu boeat toeroet masoek soldadoe. Samentara Wie Jong Tat jang beroemoer belon tjoekoep doeapoeloe taon, agaknja djoega ada mendjadi poetra dari bekas Sian Hong taon doeloe, Goei Hoan, jang menggoenakan nama samaran, dari itoe selama dia berdiam di goenoeng Tjoei Taij San, tiada maoe membinasakan djiwanja soldadoe negri, hanja mejakinken boeat mengoempoel soldadoe - soldadoe, begitoe djoega dia soeda perloeken meneloeng Hong Hoe Keng poenja anak - bini, serta tinggal bersama - sama di atas goenoeng. Dan sekarang, ternjatalah itoe Goan Swee dan Sian Hong jang ini waktoe lagi memoekoel Tiauwsian, sebenernja ada Kok Thio ampoenja moesoe besar, hari kemoedian kapan marika balik poelang kemari dengan beroleh kemenangan, marika tentoeaken bales bikin soesah pada Kok Thio".

Lauw Tjiat sekarang baroe mendoesin dan boekan maen iapoenja rasa gegetoen. Sebaliknja Ong Siauwsian beroelang - oelang telah kirim rapportan prihal kemenangannja, maka ia djadi sanget berkoeatir Tiauwsian nanti dapet ditaloekin, atawa Hong Hoe

Keng bersama poetranja balik poelang kemari, tiada bisa disangkal lagi marika tentoe nanti bikin pembalesan, dari itoe ia perloe sekelasnja mengambil tindakan boeat menghalangin Ong Siauw Hoe ampoenja maksoed.

Ia laloe menoelis sepoetjoek soerat resia boeat disampeken pada Oh Pit Khaij, dalem mana dimaksoedken, bahoea lantaran ia sendiri meliat Goan Seng Tjong masi beroemoer amat moeda, goblok dan lembek dalem segala perkara, hingga banjak mantri-mantri dorna jang memegang kekoeasaän besar, mendjadi takdir Allah kebanjakan berfihak pada Tiauw Sian, maka djoega ia sendiri mengandoeng niatan hendak menaloek boeat tiada melanggar kemaoeannja Toehan. Itoe Goan Swee Ong Siauw Hoe, jalah poetranja Hong Hoe Keng dan Sian Hong Wie Jong Tat, poen ada poetranja Goei Hoan. Maka itoe divoorstelken baek sekali orang lantas atoer dan iket Hong Hoe Keng serta Goei Hoan di kapala kapal, atawa angantjem boeat dimasoekin dalem kwali minjak jang sedeng mendidi, kapan Ong Siauw Hoe sekalian tiada maoe menaloek, atawa baek djoega kaloe ternjata Ong Siauw Hoe masi membandel, di hadapan siapa setiap hari orang mengiris satoe kali di bagian toeboeh-

nja Hong Hoe Keng dan Goei Hoan. Dengan tjara begitoe, Ong Siauw Hoe tentoe aken merasa antjoer-remoek di hati dan djantoengnja, kaloe ia tiada mati lantaran Kek-khie, sedikitnja ia tentoe tiada bernapsoe aken mengoeroes segala oeroesan balatentara dan inilah menggampangken boeat Oh Pit Khaij lantas poekoel antjoer pasoe-kannja. Sesoeda itoe, Lauw Tjiat sendiri nanti voorstelken sala satoe iapoenja Boen Seng, selakoe Goan Swee membawa balatentara kemari, tetapi belaga kala dan kasi kesempetan boeat Oh Pit Khaij bersama pasoe-kannja madjoe teroes hingga ka kota radja, begitoelah ia nanti berichtiar boeat menjamboet dengan boekain pintoe kota, serta boe-noe mati Goan Seng Tjong dan reboet kedodoekannja.

Sesoeda mengatoer beres ini soerat, Lauw Tjiat prenta orangnja aken sigra pergi menjewa seboeah kapal besar, jang didjadiken sebagai satoe kapal dagang, memoeat roepa-roepa bahan obat jang berharga 1000 tael lebi, serta tjari djoega satoe soedagar jang soeda biasa koeliling ka berbagi-bagi negri asing dan begitoelah kemoedian orang dapetken pada Tjin Saij Po.

Pada ini orang, Lauw Tjiat pesen boeat

ia boleh bawa itoe kapal berikoet semoea isinja menoedjoe ka moeka laoetan dari perwatesan Teng Tjioe, kapan ketemoe dengen kapalnja Tiauw Sian, boleh serahkan itoe soerat boeat disampeken pada Oh Pit Khaij, sedeng Tjin Saij Po sigra boleh balik poelang ka kota radja dan seadanja itoe obat-obat terserah padanja sebagai persenan. Lebi djaoe poen telah disediaken soerat-soerat ketrangan selengkepnja oentoek digoenaken kaloe ada pemereksaän.

Tjin Saij Po jang tiada mengetahoei kaloe itoe soerat sebenernja ada soerat berchianat, tapi meloeloe kerna serakaän itoe oepahan besar, maka ia soeda trima itoe prenta dan zonder berajalan ia soeda lantas sampe di Teng Tjioe, tapi djoestroe Hoan Koen telah moendoer masoek ka moeara Saij Tjoe Khauw lantaran beroleh kekalahan besar. Dari itoe, malem-malem djoega Tjin Saij Po landjoetken perdjalanannja boeat djoempaken kapalnja Hoan Koen, tapi tiada njana ia sekarang moesti mendjadi orang tawanan dari Wie Jong Tat.

Besok paginja, koetika Ong Goan Swee soeda berdoedoek dalem pasanggrahannja, Wie Jong Tat lantas madjoe mengadep sambil menoetoerken hal apa jang telah kedja-

dian tadi malem. Siauw Hoe poen laloe titah bawa Tjin Saij Po dan sekalian toekang-toekang praoe itoe dateng mengadep, begitoelah sebentar lagi itoe semoea orang soeda pada dateng berloetoet di sitoe.

Ong Goan Swee laloe lakoeken berbagi-bagi pertanjaän pada Tjin Saij Po, sedeng Saij Po poen membri penjaoetan sama seperti pengakoeannja tadi malem di hadepan Jong Tat.

Ong Goan Swee djoega djadi bertjoeriga apabila soeda mendenger pengakoean begitoe, ia lantas titah orang-orangnja aken gledah badannja itoe semoea orang satoe-persatoe tapi tiada ada kedapetan satoe jang membawa barang-barang jang terlarang. Belon poeas dengen itoe, Goan Swee kita prenta lagi Him Hauw bersama Hek Eng Lam, membawa sedjoemblah soldadoe aken pergi ka kapalnja Tjin Saij Po boeat menggledah lebi djaoe, di sitoe poen tiada kedapetan apa-apa, dengen tangan kosong marika balik kombali boeat membri rapportan.

Mendenger itoe rapportan, Ong Goan Swee djadi termenoeng sekoetika lamanja, tapi kemoedian dengen soeara keras ia menjentak katanja :

„Tjin Saij Po, kae toch tjoema membawa



itoe barang-barang kasar berharga 1000 tael lebi, begimana kae mampoe angkat sendiri segala ongkos-ongkos dari satoe kapal, moestail amat keoentoengan jang kae bakal tarik dari moeatannja itoe kapal nanti bisa menoetoe-pin itoe semoea. Apalagi djoestroe di waktoe doea negri sedeng maloemken peperangan, kae dateng sebagai satoe soedagar dengan meloepaken segala bahaja jang senantiasa bisa mengantjem atas keslaman djiwamoe. Ja, ja, dalem ini tentoe ada terselip seroepa resia besar, kaloe tiada mae dibilang kae ada mendjadi sala satoe dari sekean banjakkja mata-mata fihak moesoe. Begitoe djoega kae sama sekali tiada membawa soerat ketrangan dari kapala pementahan di kediamanmoe, sebaliknya apa jang teroendjoek sekarang meloeloe ada ketrangan dari Goan Seng Houw. Inilah semoea ada hal-hal jang tjoekoep menerbitken ketjoerigaän, maka lebi baek kae mengakoe sadja teroes-terang, agar soepaja tiada sampe menangoeng kesakitan dari kompesan."

Berbareng habisnja ini oetjapan, Ong Goan Swee laloe berpaling pada iapoenna pengiring, membri tanda boeat lantas menjediaken matjem-matjem perkakas kompesan. Dan Saij Po setelah meliat itoe keadaän, djadi sanget

terprandjat, kemoedian ia membilang dengan soeara bergoemeteran :

„Hamba merasa sedikit djoega tiada ada berboeat kedosaän, maka hal apa jang hamba moesti mengakoein.”

„Hm, kaloe tiada goenaken kompesan berat, masa kae mae mengakoe!” membentak Ong Goan Swee dengan useran dan sembari berpaling pada orang-orangnja kembali ia memerenta : „Hajo lantäs rangket ini gladak !”

Beberapa orang soldadoe berbareng lantäs madjoe ka depan, pasangin perkakas djepitan di kedoea loetoetnja Tjin Saij Po, seraja tarik talinja jang ada di sitoe dan baroe sädja lima-anem kali tarikan, Tjin Saij Po kelihatan soeda djato klenger, sedeng soldadoe-soldadoe jang mendjalanken itoe kompesan, dengan aer dingin semboerken di moeka orang, hingga pelahan-pelahan ia itoe djadi sijoeman poela, tapi berbareng ia rasaken seroepa kesakitan jang tiada terderita.

„Ampoen, Goan Swee,” achirnja ia berkata dengan soeara sesambatan, „djanganlah mengompes poela, hamba soeka mengakoe dengan sebenernja !”

Goan Swee lantäs titah laloeken itoe djepitan, sedeng Saij Po moelai menoetoerken

satoe persatoe prihal Lauw Tjiat prenta ia membawa soerat resia boeat disampeken pada Oh Pit Khaij.

Siauw Hoe djadi sanget girang setelah mendapat pengakoean begitoe, kemoedian laloe menanja lagi:

„Mana itoe soerat? Kasi oendjoek pada-koe!”

„Sekarang ada tersimpen di dalem kapal,” saolet Tjin Saij Po, „idzinken hamba boeat pergi ambil bawa dateng.”

Ong Goan Swee menitah Hek Eng Lam boeat ikoetin pada itoe soedagar pergi ka kapalnja mengambil soerat terseboet.

Hek Eng Lam trima itoe prenta laloe membawa sedjoemblah soldadoe, iringin Tjin Saij Po toeroen poela ka kapainja. Di mana deket betöelan kamar kapal, Tjin Saij Po boeka satoe papan toetoeapan, jang dalemnja terdapat seboeah doos kajoe dengan terpakoe pada pinggiran kapal. Kemoedian ia laloe ambil itoe doos dan bersama-sama Hek Eng Lam balik poela ka pasanggrahan boeat diserahkan pada Ong Goan Swee.

Di sitoe djoega itoe doos lantass diboeka, serta ambil keloeaar soerat terseboet, jang pada envelopnja ada tertoealis a'amat: Tersampeken pada Oh Goan Swee boeat diboe-

ka batja sendiri dan terkirim oleh: Goan Seng Houw, Lauw. Lebi djaoe di atas mana poen ada terdapat tjap kebesaran dari Goan Seng Houw.

Apabila soeratnja soeda dikeloearken serta terbatja habis, dalem hatinja Siauw Hoe boekan maen poenja kaget, seraja berpikir saorang diri, tjoba ini soerat kedjadian sampe djato di tangan Oh Pit Khaij, siapa tentoe kerdjaken sebegimana ada jang terseboet di sitoe, dengen begitoe, nistjajalah ia aken djadi sanget bertjilaka, boekan sadja perkerdjaännja djadi kaloet, tapi djoega segala djasa jang ia soeda perolehken bakal mendjadi sia-sia dan satoe kegagalan besar sigra tertampak di depan mata

Sesoeda itoe, Siauw Hoe laloe serahkan itoe soerat pada Him Hauw dan Wie Jong Tat boeat dibatja. Kedoea orang ini poen oendjoekin roepa jang tiada koerang kagetnja, sembari membilang dengen menggoleng-goleng kapalanja :

„Ach, soengggoe tiada dinjana si dorna bisa berlakoe begitoe doerhaka dan kedjem, jang setelah mengetahoei kitapoenja asaloesoel, lantas sadja mengirim soerat aken bikin persekoetoean dengen Tiauw Sian. Soekoer sekali Toehan tiada iringin mak-

soednja, maka ini soerat bisa djato dalem tangan Goan Swee, hingga satoe bahaja besar djadi dapet disingkirin."

„Sri-baginda ada amat moerah hati, biasanja biarpoen itoe kiparat toea-bangka ada berboeat kesalahan apa-apa, selaloe mendapet kebebasan serta kelonggaran," achirnja Ong Goan Swee berkata lagi dengan ketawa, „tapi sekarang setelah kita mendapet ini se-poetjoek soerat, sama djoega kita memegang satoe boekti jang paling tegoe boeat diapoenja niatan chianat pada negri, satoe dosa besar jang tiada bisa mendapet keampoenan poela dan tiada-dapet-tiada dia moesti hadepin kematian atawa kemoesnaän berikoet seroema-tanganja, hingga kitapoenja sakit hati poen tetoeroetan dapet terbales himpas dalem tjara jang amat memoeasken!"

Kemoedian Siauw Hoe titah orangnja aken oendjoekin itoe soerat pada Tjin Saij Po, agar siapa poen bisa menjaksiken apa jang tertoealis di sitoe. Maka Tjin Saij Po setelah membatja habis, boeat sekoetika lamanja ia tinggal terlonggong-longgong mirip orang keilangan semangat bahna kagetnja.

„Hm, kae soeda brani mendjadi orang perantaraännja sang dorna boeat menjampeken ini soerat," Ong Goan Swee berkata poela

pada Tjin Saij Po, „ternjata kaeo djoega ada teritoeng sala satoe kawanana jang teroetama dari golongan pengchianat negri. Dan kaeo taoe, hoekoeman apa jang kaeo nanti moesti trima?”

„Dia telah mendjoestaïn hamba dengan membilang soerat ini jalah ada satoe soerat sangkoetan tentang pengiriman barang-barang, maka itoe hamba maoe mendjadi orang perantaraännja boeat menjampeken pada alamatnja,” demikianlah menjaoet Tjin Saij Po sambil manggoet-manggoetken kapalanja ber-oelang-oelang sampe di tana, „soenggoe-soenggoe hamba tiada taoe, djoega tiada sekali mengira kaloe ini ada soerat boeat berchianat, moehoenlah Goan Swee ampoenja kemoerahan soepaja hamba bisa beroleh kempoenan.”

„Kaloe kaeo masi maoe idoep, biarlah boeat samentara kaeo tetep berdiam di sini dengan Poen Swee perlakoeken kaeo tentoe dalem tjara sepantesnja,” berkata Siauw Hoe, „toenggoe sampe kitaorang soeda balik poelang ka kota radja, bolehlah di hadepan baginda kaeo oendjoekin pengakoean sebetoelnja, soepaja Lauw Tjiat tiada dapet djalan boeat lolosin dirinja. Dengan begitoe, boekan sadja akoe nanti berdaja sekerasnja soe-

paja kae tiada sampe mendapat dosa, malah kae djoega bakal trima oepahan setjoe-koepnja dari akoe."

„Soeda terang kaloe dia sengadja mae merembet hamba pada itoe hoekoeman mati," djawab Tjin Saij Po dengan merasa amat gegetoen, „maka bila hamba sampe bisa dihadepken ka bawah doeli sri-baginda, hamba tentoe oendjoekin dengan tandes serta mendjadi saksi satoe-satoenja boeat membe-ratkan padanja, soepaja bisa membaes ini panasaran."

Kemoedian Goan Swee titah boleh lepas-ken semoea iketan dari toekang - toekang prae terseboet serta boleh balik kombali di kapal marika, tapi di bawah soeatoe peni-likan keras jang kapal itoe moesti tetep ting-gal berada di antara pasoeakan kapal pe-rangnja, tiada boleh berlaloe dengan merdi-ka, sedeng soeratnja Lauw Tjiat adalah ter-simpn dengan rapi pada Goan Swee kita dan dalem boekoe pahala tiada loepa ter-tjatet boeat djasanja Jong Tat tentang itoe penangkepan.

Sesoedanja mengatoer beres ini semoea, Ong Goan Swee laloe titah poela madjoeken bebrapa kapal perangnja aken pergi men-desek minta perang, menjatji serta memaki

sekena-kenanja pada fihak Goan Koen. Membikin Jauw To jang mendenger soera-soera makian begitoe roepa djadi merasa sanget panasaran dalem hatinja, kemoedian ia laloe djoempaken pada Oh Pit Khaij sembari membilang katanja :

„Pin To pikir, Goan Koen tjoema mengandel pada Ong Siauw Hoe satoe orang, kaloe sadja Ong Siauw Hoe bisa dibinasaken, Goan Koen jang keilangan kapala tentoelah semoea keadaän bakal beroba mendjadi kaloet, atawa marika lantas tinggal lari. Dengan begitoe, kita djadi bisa madjoe menjerang ~~Ting~~ Tjioe setjara leloeasa, zonder ada satoe orang djoega jang brani melawan. Ini sebab, Pin To tetepken niatan boeat nanti malem melajang ka oedara dan menggoenakan ilmoe „mengilang”, diam - diam masoek dalem pasanggrahan moesoe, toenggoe sewaktoe Ong Siauw Hoe soeda tidoer poeles, Pin To lantas toeroenin tangan boenoe mati padanja. Kemoedian kitaorang aken hadepin keadaän : dari kekalahan berbalik mendjadi kemenangan.”

„Bagoes,” berkata Oh Pit Khaij, „biarlah nanti malem Koen Soe bisa kerdjaken itoe maksoed dengan berhasil. Mari sekarang kitaorang doedoek makan-minoem boeat ter-



lebi doeloe membri slamet atas djasa besar jang bakal didapetken oleh Koen Soe."

Begitoelah kedoea orang itoe telah doedoek minoem teroes - meneroes sampe hari mendjadi sore, atawa sesoedanja waktoe orang pasang pelita, baroelah Sin Boe Todjin berpamitan dan balik poelang ka kapalnja sendiri. Di sitoe, ia ganti pakeannja jalah make badjoe dan tjelana pendek, semoea dari warna item, sedeng sepasang golok tiada loepa ada tersimpen di badannja.

Setelah ia berdoedoek sekoetika lama poela, baroelah ia bangoen berdiri dengan moeloet berkemak-kemik membatja doanja, langsoeng badannja melajang naek ka atas mega dan menoedjoe ka pasanggrahannja Ong Goan Swee.

Itoe tempo, soeda djam satoe liwat sedikit, Sin Boe Todjin laloe goenaken iapoenja ilmoe „mengilang” sambil toeroen dari atas mega dan djoestroe itoe waktoe ia djato betoel di kapalnja Hong Hoe Tiang Hoa.

Hong Hoe Siotjia jang sedeng masoek oesia delapanblas taon, satoe masa jang penoe dengan segala keilokan dan keindahan bagi sesoeatoe poetri sebagai prawan dewasa, tambahan lagi Siotjia memang ada berparas amat eilok, maka tiada heran itoe waktoe

Jaurw To mendjadi dapetken satoe gadis eilok jang djarang diketemoeken, sedeng di badannja koetika mana ada memake pakean sari-sari, berdoedoek dengan menoenjang djangoet di bawah sinaran api pelita.

Dalem sekedjapan, semangatnja Sin Boe Todjin merasa terbang keloeur dari badannja, apabila soeda memandeng itoe paras jang demikian tjantiknja.

„Satoe kemoedjoeran besar,” demikian berpikir sang Todjin dalem hatinja, „bahoea ini malem akoe beroentoeng bisa djoempaken satoe gadis jang begini tjantik! Baeklah sekarang akoe semboeni doeloe di tempat gelap, kaloe nanti dia soeda masoek tidoer, bolehlah akoe toeroet naek ka pembaringan boeat tjari kepoeasan hati, biarpoen itoe waktue dia bertreak dan mendjerit-djerit, akoe toch boleh traoesa takoet soeatoe apa.”

Ketahoeilah itoe waktue sang Todjin dalem keadaan setenga mabok, tentoe sadja soeda tiada bisa kendaliken itoe napsue djahat, begitoelah dengan ati-ati ia toeroen ka bawah kapal dan dapetken di sitoe tjoema ada menoenngoe doea orang boedak prempoean ketjil jang baroe beroemoer lebi-koerang tiga dan ampatblas taon, laen-laen orang berikoet sekalian toekang dajoeng ternjata

antero soeda pada tidoer poeles. Ia berdjalan masoek ka dalem kamar kapal, semboeni di blakang pembaringan sembari mengintjer ka arah moeka orang, semingkin memandeng semingkin napsoenja djadi berkobar-kobar.

Sedikit saät berselang, kentongan kedengeran telah dipaloe doea kali, menandakan itoe waktoe soeda djam doea malem. Siotjia keliatan memerenta iapoenja kedoea boedak ketjil itoe boeat lantas toetoep segala pintoe depan dan blakang dari kamar itoe, kemoe-dian iaorang boleh teroes pergi tidoer lebi doeloe.

Setelah liwat sedikit tempo lagi, Siotjia keliatan bangoen berdiri dari tempat doedoeknja, boeka iapoenja pakean loear, hingga sekarang di badannja melaenken menempel pakean dalem jang singset dan pendek. Api pelita ditoetoep rapi dan sepasang goloknja ada diletakin di kapala randjang, klamboe ditoeroenken dan Siotjia naek ka pembaringan boeat moelai tidoer.

Napsoe birahi dari sang Jauw To meloe-wap betoel-betoel, sampe ia rasa tiada sanggoep boeat tahan lebi lama lagi. Ia pasang koepingnja aken mendengerin, ternjata pada berbagi-bagi kapal jang berdampingan tiada kedengeran soeara soeatoe apa, antero soe-

nji-senjak.

Kembali orang berada di waktoe djam tiga malem, napas jang aloes kedengeran moelai moentjoel dari idoengnja Siotjia, mengoetarakan ia itoe soeda tidoer njenjak.

Tatkala mana, Jauw To soeda berpikir ada baik sekali lebi doeloe ia memboeka pintoe kamar, soepaja waktoe terdesek ia gampang dapet djalan boeat lari keloe-ar. Ia bertindak ka depan dan dengan pelahan-pelahan memboeka sedikit pintoe kapal sekira tjoe-koep boeat satoe orang keloe-ar - masoek. Kemoedian ia boeka toetoe-pnja pelita dan djalan mengampirin ka depan pembaringan, dengan niatan hendak melakoe-ken perkosaän sewaktoe si eilok tidoer njenjak, demikianlah di sitoe ia soeda oeloerin tangannja boeat memboeka klamboe pembaringan.

Aken tetapi, sebegimana diketahoei Hong Hoe Tiang Hoa ada berasal dari bidadari Giok Lie jang toeroen mendjelma ka doenia, blakang hari ia bakal perolehken kemoeliaän sebagai satoe Tjhia Kiong Hong Houw, dari itoe senantiasa ada melaekat - melaekat jang mendjaga dan melindoengin keslametannja dari djalan gelap. Dan itoe malem ada mendjadi gilirannja melaekat Oen Goan Swee jang wadjib lakoe-ken pendjagaännja, maka

koetika meliat sang Jauw To ada mengandoeng maksoed kedji boeat kesoetjiannja Hong Hoe Tiang Hoa, sigra djoega ia oendjoekin roepanja jang aseli di hadapan sang Todjin, berbareng mengangkat iapoenja Pian boeat memoekoel.

Sin Boe Todjin djadi sanget terprandjat, lekas ia berkelit aken singkirin itoe poekoelan, sembari dengan tjepet ia keloearken itoe sepasang golok aken kemoedian lakoeken perlawanan jang seroe Ia toedjoeken pemandengannja pada itoe orang jang sekarang lagi berhadapan padanja, maka tertampak sang melaekat ada bermoea biroe dan berdjenggot pandjang, memake pakean perang jang tertaboer mas, samentara dalem hatinja djadi berpikir dengan keheranan loear biasa, tiada bisa djadi kaloe ini semoea ada tjiptaän dari seroeapa ilmoe kesaktian jang dipoenjaken oleh si eilok, sedeng gadis itoe ini waktoe lagi tidoer njenjak.

Tapi traeroeng di sitoe soeda terdjadi soeatoe pertempoeran jang amat heibat antara kedoea fihak, hingga membikin soeara Pian dan golok jang saling beradoe kedengeran begitoe keras dan rame sekali.

Soeara inilah jang membikin Hong Hoe Tiang Hoa djadi kaget mendoesin dari tidoer-

nja, boeroe - boeroe ia bangoen berdoedoek di pinggir randjang, gantoengin klamboenja dan dari kapala pembaringan ia ambil ke-loear itoe sepasang golok, pegang begitoe roepa di tangannja setjara orang lakoeken perlindoengan boeat badannja bagian atas dan bawah.

Maskipoen itoe koetika tjahaja dari api pelita ada membri penerangan tjoekoep, tapi toch orang tjoema dapet denger soera ber-adoenja antara Pian dan golok, sama sekali tiada ada keliatan bajangan orang. Ia djadi mengarti, ini tentoe ada perboeatan dari sa-toe pengamoek jang niat lakoeken pem-boenoean gelap, maka ia lantas berkaok-kaok dengan soera keras; begitoe djoega itoe kedoea boedak ketjil jang sekarang soeda bangoen mendoesin, toeroet mendjerit-djerit katanja :

„Maling ! Ada maling !”

Berbareng itoe, dari sana-sini poen kedengeran soera treakan rame dari bebrapa banjak toekang-toekang dajoeng, hingga di kapal terseboet keadaännja sekarang soeda djadi begitoe riboet.

Meliat ini glagat Sin Boe Todjin djadi berkoeatir kaloe - kaloe ia nanti tiada mendapet kesempatan boeat melolosken dirinja,

maka itoe dengan menggoenaken soeatoe koetika baik, ia menobros keloe ar dari pintoe kapal terseboet, melajang naek ka atas mega sembari memandeng ka bawah dan dapetken masing-masing kapal Goan Koen kebanjakan berada dalem keadaän riboet kalang-kaboet. Ia poen djadi tiada bisa berdaja lebi djaoe poela, hanja kepaksa balik poelang di waktoe hari soeda moelai fadjar.

Samentara itoe, adalah Hong Hoe Tiang Hoa tempo soeda mendenger di depan pembaringan tiada lagi ada soeara sendjata beradoe maoepoen soeara apa sadja. Baroelah ia toeroen dari randjangnja memake poela iapoenja pakean loear, dan ia dapet liat pintoe kamar ada terpentang besar, membikin hatinja boekan maen poenja heran dan ia tiada habis mengarti apa jang soeda terdjadi baroesan.

Tiada antara lama lagi, haripoen soeda djadi terang betoel dan Ong Goan Swee keliatan telah berdoedoek di pasanggrahanja, di mana sesoedanja sekalian panglima-panglima dateng mengadep, Ong Goan Swee laloe menanja tentang kedjadian tadi malem serta di kapal siapa jang riboetin maling?

Tiang Hoa lantass menoetoerken satoe-persatoe prihal iapoenja pintoe kamar dalem

kapal, taoe - taoe soeda terpentang besar, toetoeapan pelita djoega terboeka, sedeng di depan pembaringan ada kedengeran teges sekali soearanja sendjata perang saling beradoe, tjoema tiada keliatan orangnja, maka itoe rame - rame lantas kaokin ada maling, tapi sebenernja tiada taoe apa jang soeda terdjadi.

„Inilah tentoe kerna soeda kepoetoesan daja dan kehabisan tenaga, Jauw To sengadja tenga malem boeta dateng kemari boeat lakoeken pemboenoean gelap,” achirnja Ong Goan Swee membilang setelah denger orang poenja penoetoeran, „tapi Allah rintangin maksoednja dengan sewaktoe-waktoe mengirim melaekat boeat membri perlindoengan, hingga dia tiada dapet binasaken djiwa orang dengan tjara begitoe.”

Sekalian panglima itoe djadi merasa amat terprandjat, seraja berkata dengan soeara ampir berbareng :

„Jauw To mempoenjai ilmoe siloeman jang begitoe Lihaij, djika setiap malem dia dateng kemari boeat melakoeken pemboenoean, begimalah baeknja ?”

„Tiada apa,” berkata Ong Goan Swee, „Jauw To poenja niatan tjoerang boeat pemboenoean gelap soeda tertampak, itoelah nja-



ta telah melanggar pri - kebedjikan dari Toehan jang pengasih, tiada lama lagi dia tentoe aken hadepin kemoesnaän. Tjoema kaoeorang sekalian boleh mendjaga - djaga sadja lebi ati - ati, jang kapan berdjoempa poela dia dateng kemari, Poen Swee tentoe nanti goenaken Popwee boeat menangkep padanja."

Sekalian panglima itoe maskipoen di moeloet ada membenerken itoe bitjara, tetapi dalem hatinja masing-masing traloepoet ada mengandoeng kekoeatiran, apabolehboeat iaorang kepaksa prenta masing-masing poenja orang sebawahan boeat mendjaga-djaga serta atoer persediaän, kaloe - kaloe sang Todjin dateng poela kemari dengan menggelap.

Samentara itoe, Sin Boe Todjin koetika soeda balik poelang dalem pasanggrahan, langsoeng dateng djoempaken Goan Swee, Oh Pit Khaij, jang sesoedanja saling membri hormat, lantas pada mengambil tempat doedoek.

"Begimana kesoedahannja dari Koen Soe poenja perkerdjaän?" menanja Oh Pit Khaij kemoedian.

Sang Jauw To tentoe sadja tiada maoe bitjara sebetoelnja, hanja dengan sekenanja sadja telah membri penjaoetan katanja :

„Djam tiga Pin To toeroen ka kapalnja, tiada njana di sana ada dibikin persediaan amat rapi, hingga lantaran soera treakan dari bebrapa orang soldadoe Goan Koen, berbareng antero kapal pada terbit keriboetan, ini sebab Pin To djadi terpaksa balik poelang dengan tiada beroleh hasil soeatoe apa.”

„Koen Soe poenja tipoe-daja soeda tiada berhasil,” katanja Oh Pit Khaij dengan roepa tiada seneng, „berbalik sekarang kita moesti diketawaken serta dihinaken oleh moesoe. Och, Allah !”

Kemoedian sesoeda bitjaraken poela dengan tiada bernapsoe bebrapa soeal jang tiada terlaloe penting, Sin Boe Todjin lantas berpamitan balik poelang di kapalnja sendiri, sedeng Oh Pit Khaij tinggal berdoedoek teroes dengan termenoeng - menoenng, sambil dalem hatinja rasaken berbagi - bagi pikiran jang amat roewet ; satoe tempo ia pikir bahoea Koen Soe sekarang poenja antero ilmoe kesaktian dan Popwee soeda pada terpoena, sedeng iapoenja pasoeakan balatentara semingkin ketjil djoemblahnja dan panglima poen banjak koerang, maka maski hendak melawan perang, traeroeng bakal hadepin kekalahan, tiada lebi baek ia lantas membawa seantero pasoeekannja boeat poelang sadja

ka dalem negri. Tapi sebaliknja dengan berboeat begitoe, ia poen merasa koeatir nanti dapet sala dari radjanja.

Begitoelah teroes - teroesan Oh Pit Khaij terbenem dalem gloembang pikiran, sampe lohor ia masi tinggal dalem keadaän begitoe roepa, malah keliatan berbagi - bagi kedoe-kahan dan kemenjeselan semingkin menggoda terlebi heibat poela. Achir - aehir ia lantas prenta orangnja aken menjediaken arak, boeat ia doedoek minoem aken mengilangkan kedjengkelan hati.

Tempo itoe semoea soeda disediaken, dengen dilajanin oleh pengiring - pengiringnja, Oh Pit Khaij minoem teroes zonder mempoenjai pengrasaän. Botol pertama soeda kering, sedeng botol kadoea langsoeng menjamboeng poela, demikian teroes-meneroes sehingga sore belon djoega brenti, sampe kemoedian ia djadi mabok soenggoe - soenggoe dan tiada bisa inget aken dirinja poela.

Pengiring - pengiringnja laloe angkat padanja bawa ka randjang dan baringken Oh Pit Khaij dengen baik, siapa teroes tidoer nje-njak dengen tiada mempoenjai pengrasaän soeatoe apa.

Kira-kira djam satoe malem, dalem impian Oh Pit Khaij seperti telah berpikir dalem

hatinja, bahoea sekean hari ia belon taoe begimana keadaän serta kekoeatannja pasoe-kan dari fihak Goan Koen, maka baeklah ia tjoba pergi ka loear laoetan boeat lakoe-ken satoe penjelidikan. Berpikir begitoe, de-ngen tiada merasa mendadak iapoenja soek- ma aseli keloeat dari badan kasarnja, me-roepaken saekor anak naga jang pandjang kira-kira tiga meter, kapalanja ada sebesar roda grobak. Kemoedian dengan menerbitken gontjangan heibat serta ombak jang ber-gloembang keras, ia menoedjoe ka loear dari moeloet moeara. Dan di mana sadja ia sampe, tentoe di sitoe terdjadi ombak besar berba-reng dengan angin riboet.

Koetika mana, baroe djam satoe malem, Goan Koen kebanjakan masi belon tidoer.

Tiba-tiba keliatan semoea kapal bergon-tjang keras mirip hendak terbalik, begitoe-poen Ong Goan Swee ampoenja kapal besar, djoega tiada bisa tinggal anteng. Dalem be-gitoe, saorang djoeroe kabar telah dateng membri rapportan, katanja :

„Sedikit djaoe di loear laoetan, ada ter-tampak gloembang ombak bergoeloeng-goe-loeng menoedjoe kemari, tiadakah ini soeda ada Jauw To, poenja ilmoe siloeman lagi. Maka itoe, hareplah Goan Swea mendapat

taoe."

„Ini belon bisa dipastiken," berkata Ong Goan Swee, „tapi biarlah kita moendoerken seantero kapal sampe di moeka laoetan, soe-paja kemoedian bisa bersedia dan atoer pe-nangkisan begimana baeknja."

Tempo ini prenta soeda disampeken pada semoea kapal, dengan lekas masing - masing kapal keliatan soeda pada dimadjoeken ke-loear sampe di moeka laoetan, sedeng api dan obor telah dipasang begitoe terang mi-rip sebagai siang hari, maka keliatan njata aer ombak lagi mendatengin dari djoeroesan moeloet moeara.

„Ja, ini tentoe ada Jauw To poenja ilmoe siloeman, dari itoe ombak-ombak telah dateng dari djoeroesan sana," demikian kemoedian berkata Ong Goan Swee sembari keloearin iapoenja katja Pho Long Keng dan moelai mengatja.

Aken tetapi, itoe katja tjoema bisa mem-bikin brenti angin dan ombak biasa, berserta itoe angin dan ombak jang terdjadi dari ilmoe siloeman, sebaliknya sekarang adalah angin dan ombak jang terbit lantaran pengaroeh-nja sang naga, begimanalah bisa dipademin dengan itoe katja.

Samentara itoe, binatang aer terseboet se-

mingkin dateng deket dan berbareng angin serta ombak mendjadi semingkin heibat poela, kapal-kapal serasa maoe djoengkir-balik, Ong Goan Swee sendiri merasa tiada berdaja. Tapi di sitoe soedá ada bebrapa orang soldadoe jang mempoenjai pemandengan lebi awas, telah berseroe katanja :

„Tiada sala kaloe angin dan ombak ada begitoe Lihaij, kiranja di moeka aer keliatan ada saekor naga jang sedeng mendatengin. Djikaloe dia sampe deket kemari, dikoeatir kapal-kapal kita tiada antjoer tentoe terbalik.”

Sekalian panglima jang sekarang djoega bisa dapet liat apa adanja di moeka aer, poen berbareng djadi pada riboet dengan membilang :


„Oh, ja, di moeka aer ada terdapat saekor naga !”

Ong Goan Swee poen soeda dapet liat itoe, sigra djoega ia prenta lantas lepaskan anak pana, tapi koelitnja naga jang keras, anak pana sama sekali tiada berpengaroeh, malahan itoe binatang dengan tiada merasakan apa - apa soeda dateng dan madjoe semingkin deket.

Dalem begitoe, adalah Him Hauw jang telah berpikir dalem hatinja sembari berkata saorang diri:



*Ketiga pananja djitoe, perdjodoan antara  
Hong Hoe Siauw Hoe dan Beng Lee Koen  
poen teriket.*





„Soehoe soeda persenin akoe itoe pedang Tjam Kauw Kiam, tiadakah ada teroedjoed boeat boenoe mati ini satoe binatang.”

Setelah berpikir begitoe, ia lantas berkata dengan soera keras :

„Soeda, traoesa lepaskan ini anak pana lagi, biarlah akoe nanti poedja pedang Tjam Kauw Kiam boeat binasakan padanja.”

Berbareng habisnja ini oetjapan, Him Hauw lantas keloearken iapoenja pedang wasiat serta lemparin ka oedara, jang dengan seklebatan sadja soeda toeroen ka bawah serta mengoetoengin betoel itoe naga poenja leher, dari mana lantas menjemboer keloear boekan sedikit dara-dara mera, sedeng Tjam Kauw Kiam telah melajang naek poela ka atas oedara.

Itoe binatang setelah bikin bebrapa kali lompatan dan berkledjetan, blakangan dengan peroetnja mengadep langit, ia djadi mati terbinasa di moeka aer, samentara angin dan ombak berbareng poen mendjadi sirep. Ini keadaän tentoe sadja membikin Him Hauw djadi sanget girang, laloe ia panggil poelang sang pedang wasiat, sedeng laen-laen panglima antero djadi memoedji katanja :

„Tjoba kaloe tiada ada Him Sian Hong ampoenja Pokiam, ini binatang pasti tiada

begitoe gampang terboenoe mati!"

„Ja, ini binatang ada begitoe pandjang dan besar, di kapalanja tentoe ada terdapat moestikanja.”

Kemoedian ia laloe prenta bebrapa kapal ketjil aken samperin deket sitoe, balikin baddannja serta preksa kapalanja, bener djoega tiada lama kemoedian dari dalem mana orang soeda bisa keloearken sebidji moetiara jang ada sebesar djempolan tangan, berkreddep-kreddep menjiloken mata Sesoeda itoe, sang mait orang lantas biarken anjoet sendiri di moeka laoetan menoerøet aliran ombak.

Samentara tiada lama lagi, masing-masing kapal telah balik poelang di pasanggrahan, di mana Ong Goan Swee menjatet Him Hauw poenja djasa itoe, sedeng Him Hauw keliatan dateng mempersembahkan itoe moetiara pada Ong Goan Swee, tapi Goan Swee kita soeda membilang katanja:

„Inilah ada Heng Tiang ampoenja pahala, maka djoega ini moetiara wadajib dipoenjaken oleh Heng Tiang sendiri. Poen Swee tiada ada sangkoetan soeatoe apa.”

Him Hauw poen lantas simpen itoe moestika dengan oetjapken trima kasi.

Samentara itoe, Oh Pit Khaij jang lagi tidoer njenjak di atas pembaringan, tiba-tiba

soeda mendjerit satoe kali dengan soeara keras, berbareng itoe badannja poen djato bergoeling di bawah pembaringan. Pengiring-pengiringnja koetika mendenger soeara begitoe, boeroe-boeroe marika masoek meliat, lebi doeloer iaorang mengira sang Goan Swee telah djato lantaran mabok arak, tapi tempo marika soeda dateng lebi deket boeat mengangkatin, ternjata di sitoe penoe berloemoeran dara-dara jang baroe, sedeng lehernja keliatan terpoetoes.

Begimana besar kagetnja itoe pengiring-pengiring, itoelah tiada bisa dibilang dengan pasti. Tergopo-gopo marika lari keloeuar boeat mengasi rapportan pada panglima laennja.

Panglima-panglima Tiau w Sian pada djadi kaget boekan maen setelah mendapat rapportan begitoe, rame-rame marika memboeroe masoek dan bener sekali iaorang dapetken sang Goan Swee telah mati terbinasa dalem tjara jang amat gaib. Kemoedian ia orang lantas angkat itoe mait letakin poela di atas randjang, sedeng dalem begitoe ada djoega doea orang panglima jang mempoe-njai pengartian lebi baek soeda lantas membilang katanja :

„Ja, ini kedjadian haroes sekali dipegang resia dan djaga djangan sampe teroewar di

loearan, melaenken dengan diam - diam kita moesti kasi rapportan pada Koen Soe saorang."

Sala satoe pengiring lantas diprenta aken pergi ka kapalnja Sin Boe Todjin boeat membri rapportan sedjelasnja apa jang soeda terdjadi, samentara sang Koen Soe djadi sanget terprandjat setelah mendenger warta itoe, sampe ia rasaken semangatnja tiada lagi berada di badannja, boeroe - boeroe ia laloe toeroen di kapal ketjil boeat dateng di kapalnja Goan Swee, di mana ia disamboet oleh sekalian panglima - panglima serta bersama-sama masoek ka dalem boeat menilikin maitnja Oh Pit Khaij.

### XLIII.

Hoan Koen Soe kena tertawan, njataken menaloek. Hong Hoe Keng terlepas dari kesengsaraän, bertemoe anaknja.

---

Tatkala Sin Boe Todjin soeda mereksa dengan teliti keadaännja itoe mait, ia dapet kenjataan bahoea betoel sekali di lehernja. Oh Pit Khaij ada bekas loeka dari batjokannya pedang. Ia selidikin keadaän da'em kapal waktoe terdjadinja itoe ketjilakaän, kemoe-dian ternjata di sitoe melaenken ada kedapetan pengiring-pengiring dari sang Goan Swee jang boleh dipertjaja, sama sekali tiada terdapet ada orang loear, hingga ia djadi tiada habis mengarti begimana ini kedjadian bisa terbit begitoe mendadak. Tiadakah bisa djadi Allah telah oetoes panglima melaekat boeat toeroen binasaken padanja? Tapi ia poen tiada bisa berboeat laen, ketjoeali memesen pada sekalian orang jang berada di sitoe, soepaja tiada petjaken ini kedjadian di loearan, sekalipoen pada soldadoe-soldadoe sendiri.

Begitoelah dengan diam-diam orang laloe sediaken peti-mait serta dengan tiada menoenngoe tempo lama, mait itoe sigra dimasoekin dalem peti dengan sedikit oepatjara

jang sepi. Lebi djaoe dititah saorang oetoesan aken sigra brangkat boeat persembahkan rapportan pada marikapoenja radja hal kematian itoe.

Samentara Ong Goan Koen poen saben hari tiada brenti - brentinja telah dateng minta perang, hingga achir-achirnja membikin Sin Boe Todjin djadi mengambil poetoesan boeat tjoba lakoeken poela peprangan mati-matian terhadap fihak Goan. Begitoelah ia lantas keloearken prenta aken masing-masing kapal bikin persediaän boeat di besok hari madjoe bertempoer dengan Goan Koen:

Hoan Koen jang rata-rata tiada bernapsoe lagi, malah kebanyakan mengandoeng peng-rasaän keder dan takoet terhadap moesoe, dengan lakoe ogah-ogahan dan setjara amat terpaksa, iaorang bikin djoega itoe perse-diaän, jalah sebelon djam empat pagi di masing-masing kapal soeda pada moelai masak nasi, api pelita dan obor-obor terpasang begitoe terang sebagi siang hari.

Waktoe fadjar, djoeroe - djoeroe kabar dari Goan Koen telah dateng mengadep Ong Goan Swee, sembari membri raportan, katanja:

„Sedari bebrapa djam berselang di pasoe-kan kapal-kapal perangnja Hoan Koen, ada keliatan terang sekali dengan tjahaja api pe-

lita dan obor-obor, boleh djadi sebentar lagi marika itoe hendak maloemken peprangan, dengan ini hamba dateng membri rapportan, soepaja Goan Swee mendjadi taoe."

Belon habis itoe djoeroe-kabar atoerken rapportannja, tiba-tiba kedengeran soera tamboer dan gembeng jang amat rioeh, sedeng pasoeakan kapal perangnja Hoan Koen keliatan soeda madjoe keloeat dari moeloet moera Saij Tjoe Khauw, serta madjoe mendatengin boeat minta perang.

Ong Goan Swee poen lantas keloearken prenta aken sigra bersedia boeat madjoe menjamboet perang, demikianlah tiada antara lama kemoedian, kedengeran tiga kali soera bom beroentoen-roentoen, antero pasoeakan kapal perang Goan Koen soeda pada madjoe berbaris di moeka laetan dan djadi saling berhadapan dengan moesoe.

Dalem begitoe, Him Hauw poenja satoe kapal pertama-tama telah madjoe lebi deket pada barisan kapalnja moesoe dan sembari menoeding Sin Boe Todjin, Him Hauw memaki dengan soera keras katanja :

„Jauw To, tenga malem boeta kae dateng hendak lakoeken pemboenoean gelap, sesoeda tiada berhasil kae kirim lagi saekor naga boeat bikin terbalik kapal kita. Itoelah ada

soeatoe kedosaän jang soeda meliwatin takeran! Kaloe kae sampe dapet ditangkep, badanmoe bakal ditjintjang mendjadi berlaksa keping!”

Sehabisnja oetjapken ini perkataän, ia prenta madjoeken kapalnja lebi djaoe, langsoeng maenken iapoenja toembak menoesoek ka arah moekänja sang Todjin. Siapa poen lantas menangkis dengan pedangnja, hingga di s-toe djadi keliatan terbit satoe pertempoeran jang sengit.

Ong Goan Swee titah aken sekalian panglimanja lantas madjoeken kapalnja masing-masing boeat berbareng menjerang pasoeakan moesoe; tentoe sadja dengan djoemblah jang djaoe terlebi besar, Goan Koen bisa bikin fihak Tiauw Sian ampir tiada berdaja sama sekali. Inilah membikin Sin Boe Todjin poenja pikiran lekas mendjadi kaloet dan berada dalem kegoegoepan.

Samentara itoe, zonder bersoeara lagi Ong Siauw Hoe lantas lepaskan ka oedara iapoenja tali Ang Kim Toat So, jang dengan ketjepetan sebagai kilat telah toeroen menoe-toepin dari atas kapalanja Sin Boe Todjin, hingga tiada membri kesempatan boeat si Todjin bisa singkirin dirinja, kerna begitoe dapet liat itoe sinaran terang menoe djoe



pada dirinja, berbareng ia soeda lantak kena teriket kentjeng oleh tali wasiat terseboet, serta djato roeboe di atas kapalnja dengan tiada bisa berkoetik poela.

Lekas sekali Him Hauw lompat ka itoe kapal dengan terikoet oleh sekalian soldadoe soldadoenja, jang dengan sebentar sadja marika soeda bisa mereboet itoe kapal, setelah laskar-laskar Hoan jang berada di sitoe pada njataken soeka menaloek.

Kemoedian Ong Goan Swee prenta boenjiken gembreng boeat tarik poelang seantero pasoekannja teroes kombali di pasang-grahannja sendiri. Di sitoe orang lantak bawa dateng Sin Boe Todjin jang teriket mendjadi satoe goeloengan, taro begitoe roepa di atas papan kapal.

„Kaloe Goan Swee soeka membri keampoenan,” memoehoen Sin Boe Todjin, „Pin To tentoe nanti atoer sampe soepaja radjakoe soeka menaloek.”

„Seande Koen Soe memang poenja niatan begitoe,” kata Ong Goan Swee dengan girang, „Poen Swee tentoe lantak melepaskan padamoe.”

Sekalian panglima-panglima menjega maksoednja Ong Goan Swee dengan tjepet sembari membilang dengan soeara ampir ber-

bareng :

„Djangan, Goan Swee, Jauw To tiada boleh dilepaskan dengan gampang, haroeslah dikoeatirken jang dia mempoenjai banjak ketjoerangan. Siapa taœ, sesoeda dia dilepaskan, dia nanti terbitken laen hoeroe-hara poela.”

„Tetapi, dia toch ada teritoeng saorang pertapaän jang perna soetjiken diri,” berkata lagi Ong Goan Swee, „sedikit-banjak dia tentoe masi mengarti, kaloe Poen Swee soeda kasi lepas padanja, dia tentoe bisa pikir begimana baeknja; sebaliknja kaloe dia masi djoega berlakoe bantahan, boeat tangkep poela padanja toch tiada terlaloe soeker.”

„Ja, setelah Pin To menjesel atas segala perboeatan jang soeda-soeda, Pin To tentoe tiada aken beroba pikiran lagi,” berkata Sin Boe Todjin, „biarlah Goan Swee djangan berkoetir soeatoe apa poela.”

„Memang djoega Poen Swee tiada ada alesan boeat bersangsi lagi,” kata lebi djaoe Ong Siauw Hoe, „lebi lagi menginget Koen Soe ada saorang pertapaän, tentoe sekali mempoenjai pengartian lebi baek daripada orang biaas.”

Kemoedian Ong Goan Swee lantas madjoe ka depan, ambil poelang iapoenja Ang Kim

Toat So dan dengan kedoea tangannja ia angkat bangoenin pada Sin Boe Todjin, sembari membilang dengan mengatoerken maäf, katanja :

„Orang-orangkoë jang koerang pengartian soeda berlakoe begitoe roepa terhadap Koen Soe, hareplah soeka dimaäfken !”

Sin Boe Todjin meliat Ong Goan Swee ada berlakoe begitoe manis terhadap dirinja, merasa sanget bersoekoer dalem hatinja, boeroe-boeroe ia membales hormat seraja berkata :

„Orang jang soeda kena tertawan, tiada diboenoë itoelah soeda lebi dari apa jang diharep. Sekarang kombali menerima Goan Swee poenja perlakoean begitoe hormat, soenggoë membikin dalem hati merasa maloe sendiri.”

„Koen Soe toch ada saorang gaib,” membales Ong Goan Swee, „begimana Poen Swee brani berlakoe tiada hormat.”

Kemoedian Sin Boe Todjin lantas disilahkan berdoedoek dalem tjara antara tetamoe dengan toean roema. Todjin jang tiada dapet menampik, terpaksa lantas mengambil tempat doedoek, sedeng djoeroe-lajan telah dateng menjoegoeken aer thee.

Sesoeda orang minoem setjangkir thee,

Ong Goan Swee laoe keloearken itoe satoe kantong ketjil bekas pembriannja sang goeroe dan serahken pada Sin Boe Todjin seraja membilang katanja :

„Goeroekoe, Oei Hok Tjouw Soe, ada mengirim ini satoe barang boeat Koen Soe sendiri boleh boeka dan batja.”

Sin Boe Todjin menerima itoe kantong dan dengan memegang di tangannja, ia berkata :

„Oh. kiranja Goan Swee ada moerid dari Oei Hok Tjouw Soe, tiada poen heran Pim To poenja berbagi - bagi ilmoe kebisaan senantiasa beroleh kekalahan.”

Ong Goan Swee poen lantass menoetoerken satoe - persatoe prihal ia bersama Him Hauw telah menoentoet ilmoe pada Oei Hok Sian Ong ampir tiga taon lamanja dan kemoedian atas titahnja sang goeroe iaorang toeroen goenoeng toeroet masoek soldadoe.

Todjin dengerin itoe penoetoeran sembari beroelang - oelang manggoetin kapalanja. berbareng ia poen moelai memboeka itoe kantong, serta keloearken soerat jang ada di dalemnja dan boeka batja, antara laen-laen boenjinja soerat itoe, terdapat :

„ . . . . . Dan, ketahoeilah olehmoe,

Goan Tiauw ampoenja Seng Tjong Hong Te, adalah satoe keizer jang adil dan aseli, biarlah kae membri nasehat pada radja-moe soepaja dia soeka lekas lepaskan Goan Swee Hong Hoe Keng dan Sian Hong Goei Tjin Tjong, serta sediaken barang-barang oepeti boeat dateng menaloek. Dalem kantong ini ada lagi sepoetjoe soerat jang akoe hatoerken pada kae-poenja goeroe boeat mintaken keampoenan bagi dirimoe, maka dengan membawa ini soerat, goeroemoe nistjaja aken trima poela padamoe dan kae selandjoetnja nanti bisa meneroesken pertapaänmoe dengan jakin, soepaja dapet kesampean apa jang dimaksoed. Sekali - kali djanganlah kae berlakoe alpa dan bantahan poela, kerna itoe tjoema-tjoema membikin dirimoe mendjadi kepiran boeat seoemoer idoep."

Sehabisnja membatja itoe soerat, Sin Boe Todjin djadi sanget girang dan dengan paras bersri - sri ia hatoerken trima kasinja pada Ong Goan Swee katanja :

„Oleh kerna Pin To satoe waktoe ada bertengkeran dengan goeroekoe, maka soeda dateng di Tiauw Sian boeat bantoe menerbitken ini hoeroe-hara, menjesel poen telah

kasep! Samentara Oei Hok Soe Pek dengan goeroekoe memang ada bersobat baik mirip persoedaraän, sekarang soeda serahkan ini soerat boeat mintaken keampoenan bagi Pin To, jalah berarti Pin To ada harepan dapet djalan menjingkirin diri dari perboeatan jang tersesat boeat menempoeh poela pada djalanan jang djoedjoer dan terang."

Selagi orang beromong - omong, di sitoe keliatan soeda disediakan beres seboeah medja perdjamoean. Todjin lebi doeloe adjar berkenalan dengan sekalian panglima-panglima serta satoe sama laen mendjalanken peradatan sebegimana lajiknja. Dan ini keadaän telah membikin sekalian panglima itoe poen toeroet merasa seneng. Marika bergoembira bahoea sekarang dari satoe moesoe tiada njana bisa berbalik mendjadi sobat, itoe poen berarti tamatnja peprangan. Demikianlah kemoedian dengan pengrasaän amat boengah, semoea orang pada ambil tempat doedoek dengan mengadepin medja perdjamoean.

Dalem makan dan minoem itoe, Todjin ada membilang pada Ong Goan Swee:

„Sekarang oeroesan soeda beres, Goan Swee tentoe prenta seantero pasoeakan aken tinggal mengaso, sedeng Pin To sendiri nanti

balik poelang dalem negri dengan melajang di mega-mega, boeat boedjoek radjakoe soeka lantas melepaskan Hong Hoe Goan Swee berikoet Sian Hongnja, serta sediaken oepeti boeat hatoer menaloek, aken kemoedian minta Goan Swee djoega kasi lepas sekalian Hoan Koen jang dapet ditangkep, serta kasi poelang itoe kapal-kapal perang jang dapet direboet. Sesoeda itoe Pin To poen aken lantas balik poelang di goenoeng boeat landjoetken pertapaän dengan tiada pikir lagi boeat toeroen di doenia ”

„Memang begitoe ada djalan jang paling bæek,” berkata Ong Goan Swee, „tetapi dikoeatirin Oh Pit Khajj nanti tetep membandel dan tiada soeka lantas menaloek, maka begimanalalah baeknja ?”

„Oh Pit Khajj soeda mati sedari bebrapa hari berselang,” berkata Sin Boe Todjin, „masakah Goan Swee belon djoega mengetahoei ?”

Mendenger ini perkataän, Siauw Hoe djadi sedikit terprandjat tapi tjampoer kegirangan, sembari menanja pada sang Todjin :

„Oh Pit Khajj terserang penjakit apa dan kapan matinja ?”

„Kaloe maoe dibitjaraken ini hal, soenggoe bisa dibilang ada satoe keanehan,” ber-

kata Sin Boe Todjin sambil menoetoerken sedjelasnja tentang itoe kedjadian berhoeboeng dengan kematiannja Oh Pit Khaij jang amat gaib.

Mendenger itoe penoetoeran, Ong Goan Swee djadi terpekoer sedjoeroes lamanja sebagai orang asik berpikir; achirnja, dengan roepa seperti orang baroe tersedar, ia membilang katanja :

„Ditilik dari sini, amat bisa djadi Oh Pit Khaij tentoe tadinja ada berasal dari satoe naga jang mendjelma ka doenia!”

Sehabisnja berkata, Siauw Hoe poen laloe tjeritaken halnja itoe malem Him Hauw telah memboenoe itoe binatang aer dengan Tjam Kauw Kiam. Samentara menoeroet hari dan djam terdjadinja ini doea kedjadian ternjata ada tjotjok betoel satoe sama laen.

Todjin memanggoetken kapalanja sembari membenerken itoe bitjara. Kemoedian sesoeda bersantap lagi boeat sekoetika lama, Sin Boe Todjin laloe berpamitan katanja:

*(Aken disamboeng).*